



勉菴集  
十四

共二十三

~ 16  
2374  
14



和  
2374  
23-14

勉菴先生文集卷之二十七目錄  
墓碣



司憲府持平梁公墓碣銘

朴都事墓碣銘

容閒齋吳公墓碣銘

副護軍李公墓碣銘

慕懷堂李公墓碣銘

平海郡守柳公墓碣銘

澗菴柳公墓碣銘

麟溪處士魏公墓碣銘

成均進士金公墓碣銘

敦寧府都正崔公墓碣銘

愚村李公墓碣銘

成均進士南溪金公墓碣銘

知中樞好德齋文公墓碣銘

學生李公墓碣銘

訓鍊副正李公墓碣銘

梁山廉公墓碣銘

成均生貞崔君墓碣銘

同副承旨鄭公墓碣銘

滄洲鄭公墓碣銘

靈巖郡守文公墓碣銘

鳳山居士文公墓碣銘

成均進士文公墓碣銘

繕工監假監役梁松圃翁墓碣銘

西巖居士鄭君墓碣銘

竹窩金公墓碣銘

贈司憲府持平安公墓碣銘

繕工監假監役月難吳公墓碣銘

春湖曹公墓碣銘

勉菴先生文集卷之二十七目錄

勉菴先生文集卷之二十七

墓碣

司憲府持平梁公墓碣銘 并序

松湖梁公諱德浩字德潤系出濟州遠祖洵仕新羅  
 封漢掣君自是世有聞人歷羅麗及本 朝班班可  
 考也至學圃先生諱彭孫官校理 中廟己卯以守  
 正不撓錮後 贈吏判謚惠康諱渭南官叅奉 仁  
 廟甲子移檄舉義至丁卯亦然諱之灑號益愚與兄  
 之沆學于允齋宋先生門曾大父諱益祖官縣監大  
 父諱成憲皇考諱中鉉妣海州崔氏贊興女副提學



萬理后公以 正廟辛亥四月五日生 純廟辛卯  
登文科爲典籍監察持平正言出爲 慶基殿令以  
終寔丙申三月十六日也壽四十六葬于綾州松石  
面金盤之壬原配光山金氏河章女監司枋玄孫次  
配光山盧氏聖浩女皆葬同公原次配沃城張氏鎮  
伍女別葬于世清面華鶴山登龍洞庚原有二男三  
女男權女林相潤全東賢閔致良金氏出也松張氏  
出也權男晉煥漸煥松无育子漸煥松以家狀千里  
走書求銘其墓按狀公稟質穎異性且孝讀書之暇  
左右服勞以養親及遭艱廬墓盡制莅官奉公歷有

聲稱張夫人亦賢有德當公疾病斷指割股及歿欲  
下從適有遺腹家人以此曉譬夫人感悟而止其遺  
腹卽松也余知松謹得其實言不誣遂爲之銘銘曰  
才穎而秀又孝而勤不大厥報以裕其後昆

朴都事墓碣銘

密陽朴有善士漢龜諱文瑞字父宗鐸隱不仕行義  
篤聞鄉里母其誼國姓李庚寅降乙未卒究終始多  
可述幼穎悟壯謹密四昆季序居一兄曰咨汝其悉  
父母老生理細幹家務吾自力讀古書乃爾職貴守  
約何必多外小學斷無他是焉政靡朝夕賞稍饒誠

所格戶六七享一樂產土田均豐約存而憂前後恪  
禮吉凶備儀物急人窮如已疾肆遠近聲譽蔚論其  
槩幾無匹娶李氏光山源配德音安同原名揆秉是  
一男鄭尹閔女婿三雲月異乃其藏斯為銘垂久長

容閒齋吳公墓碣銘

并序

綾城有隱居行詒以壽資通政至嘉善而久為鄉人  
所欽誦者容閒齋吳公壽南字禮仲是也系出寶城  
中葉以上大顯于麗入我朝有諱忠乙官贊成後  
有諱益孫以孝廉除叅奉三傳而諱邦翰以萬戶殉  
節于壬亂贈兵曹叅判於公為八世祖贈戶叅

世觀 贈僕正泰有

贈承旨錫圭

贈戶叅萬祥

為高曾祖禰妣昌寧曹氏光葉女按狀公以 健陵  
丁巳二月十四日生性質純粹見者稱以遠器自幼  
能讀書不懈甫過十歲遭王考喪哀戚如成人值歲  
大無人多餓芋蕩產贖給鄰里賴之平居不以事物  
經心惟以孝養為務弱冠丁考妣憂喪制一遵家禮  
朝夕諄慕三年疏食有妹適人而寡哀矜養恤至老  
不衰視諸姪若已出買給田庄俾有恒產至於奉先  
之節合族之道裕後之方皆有條劃人或問公家道  
雍穆何以致此曰古張公藝已言之矣與鄉里故舊

立洞規修鄉約爲勸善化俗之本被州牧薦剡而益  
加謙晦謝弟子來學而不居師道息文遊徜徉於五  
峯山水之間以今 上丙子正月六日卒里人如悲  
親戚此其八十年始終行治之大略也嗚呼公以遐  
土措大埋沒林樊雖不得展其所蘊夷攷平日修齊  
之實則可謂卓乎難及者多矣至若優老例恩之得  
沾晚年奚足謂酬其善也餘慶之發其必在後嗣子  
孫而無疑也夫墓在佛堂洞西坐齊濟州梁氏通德  
中鉉女孝友慈諒克配其德先公十二年卒墓各窆  
男應祚亦以孝行見稱云孫曾不盡錄惟狀公行者

在鴻謁余文者昌鎬也銘曰

猗歎容閒鄉之善士是其攸藏曷不敬止

副護軍李公墓碣銘

并序

嶺之丹城有一前輩忠信好學望實宣著而不得施  
者誠齋李公諱堅字守甫其人也後孫道復憲洙等  
講不明不仁之戒千里齎贄問銘於不佞不佞學淺  
文拙不堪任人金石且後公數百年之久而欲掇拾  
斷爛模寫精蘊不亦難乎以是辭謝而不獲焉則謹  
按李氏星山大族自高麗隴西郡公長庚始勲業卿  
相世不絕書八我 朝有濟錄開國一等勳封興安

君謚景武尚慶順公主配食 太室再傳至義淳  
莊陵末遜居自靖又再傳吏曹佐卽晁號桐谷師南  
冥曹先生享牧溪院於公卽王考也考惟訥號梧岡  
龍蛇舉義妣晉州鄭氏忠順衛夢虎女繼妣丹陽禹  
氏進士圖南女以 萬曆壬午舉公于元堂里第天  
賦宏厚年十四五隨學世父榮川任所時方倭警罷  
一意課程罔或少懈解經惟不失聖賢本旨是務餘  
力習功令業九解不售處之泰然旣而梧岡公老當  
傳伯兄墩屢喪室叔父梧齋唯說從父兄梅軒鼓坐  
救鄭桐溪削儒籍流遠地公兼管小大家務泛應曲

盡靡間然遭艱執喪如禮非大病衰麻不去身事繼  
母益勤務得歡心其所性然也先時浹河之役姜弘  
立韓潤等謂受廢主密旨降于虜公嘗懷憤歎語人  
曰彼二豎子借舊君以爲名終必反噬本國是誠大  
可懼至丁卯果驗人服其先見丁丑聞南漢媾成不  
能定情時攜二三同志每於蝴蝶樓上劇飲悲歌以  
宣其壹鬱季子觀國豪勇善騎射公謂武技雖非儒  
者事當茲冠屨倒置之日或者執銳前驅用贊 聖  
上大有爲之志則未必非丈夫事也遂任其志不苛  
責其達於時務不滯一隅者又如此晚由蔭調階副



護軍年八十二而顯宗癸卯考終于寢塋在縣西  
德山洞先塋內壬坐之原蓋公生長詩禮之門又與  
鄭學圃暄姜寒沙大遂諸公爲知己友敦本務實德  
義絕美而乃韜韞自晦不求人知故至於後來稱述  
無他羸辭只曰淳淳有古人風又親沒廢舉無意進  
取專心性理之學云者又見其所存所養之大槩也  
夫人江陽李氏司果邦賢女有婦德墓合祔子男三  
蓋國通德郎藩國忠義衛觀國郡守女士人朴聖奎  
通德男胤壽備儻好義女鄭瑞佑宋觀徵忠義男胤  
胄胤善胤星有儒行女生員權處亨李希元李粹然

郡守男胤錫生員有文學孝友胤白女李秀哲河德  
徵曾玄以下不盡錄銘曰

朮道有術所貴者誠誠之伊何而進知行孰不自力  
豈如我公俛焉終始以培家風積厚施薄世膺餘慶  
人歎交際寔全情性匪一家私可作世則摘辭鏤石  
君子攸式

慕懷堂李公墓碣銘

并序

學之不講久矣務外遺內者天下滔滔世之君子欲  
矯而反之則抑揚之過自予夏氏已不能免惟吾夫  
子有言曰弟子入則孝出則弟謹而信汎愛衆而親

仁行有餘力則以學文夫如是然後序順而功全君子之道備矣若故慕懷堂李公可庶幾乎此者歟公諱胤錫字善卿星州人考觀國官郡守妣居昌劉氏翼龍女祖堅號誠齋有隱德曾祖惟訥號梧岡壬辰舉義高祖晁文佐即號桐谷師事南冥曹先生為官有六月清冰之稱士林俎豆之 太祖啓運有興安府院君濟郎公八世高麗文烈公兆年事忠肅忠惠有安社忠配食王廟隴西郡公長庚其遠祖也公以顯宗辛丑生性質純粹事親以孝生養極志物居喪盡易戚自少讀書值義理肯繁處必反復思索有得

於心然後乃已為文平淡典雅有作者家風先公出宰三水修舉廢弛申嚴防守為所忤者中傷致有北京噴言朝廷雖知非罪謂事係地方配遠地公訟冤駕前特蒙 宥典為之致力者愛窩疎齋二公也晚登司馬以不及悅親無喜色築室牧溪上扁其堂曰慕懷左右圖書優遊涵泳儵然有出塵之想其詩曰未敢諉今是方能記昔非自從尤悔日抵死更無違又曰觀物心如警看書道益微是其得於中者靜深而有本故發於言者樂易冲和隱然有有道者氣像至其叔卹宗族依倣於范氏義在導率民俗取法於

藍田鄉約嗜義如渴尤翁已已慨然往吊於駭機交  
迫之際金侃之沮沙溪從祀之請也挺身與從兄及  
諸章甫上疏伸辨只此數事槩見其風流篤厚膏懷  
坦蕩利害禍福不能撓奪而學問之力儘不可誣也  
享年五十五而以某年某月考終于寢塋在牧溪枕  
坎之原配廣州安氏時行女有女士行墓在山清東  
虎額甲坐原有三男一女男長如玘次如珏如珣皆  
通德即女適潘南朴處亮如玘生一男啓彬如珏三  
男啓華啓震啓勛啓震繼如珣後曾玄以下不盡錄  
請銘者七世孫憲洙也銘曰

生長法家天賦孔溫懿茲學識則見淵源外內交養  
既厚既富保真尚純孰知我有惟躬不售遺祉在後

平海郡守柳公墓碣銘

并序

公姓柳氏諱秀汀字希舜其先晉州人高麗左右衛  
上將軍晉康君挺為鼻祖再傳至晉原君敦植高宗  
四年以後軍兵馬使討平契丹遺種子洪林以戶部  
尚書致仕退老于晉之元塘里號晴齋贈門下平章  
事歷晉興君樽晉城君珩直提學之澤至密直司使  
菁川君藩流僻隱恭愍朝以陳賀謝恩使三朝京師  
麗社屋罔僕自靖享魯峯院寔公高祖曾祖伯通始

仕我 朝官平海郡事祖升滴考德並副司正妣八  
宮鄭氏公以 成化甲辰生蔭仕至平海郡守辭官  
退居于陝川心效里先壠下享年五十一而卒於  
嘉靖甲午墓在郡西巢龍山下旺東負子之原淑人  
安東權氏叅奉苻女墓附左公居家孝友莅官敬謹  
律身御物動有規則泊於名利不求舉薦嘗謂窮達  
有數當盡在我者而已舉七男四女男長希春有行  
義 贈獻納次遇春叅奉應春思春叅奉慶春萬春  
榮春女適文翔朴荃文蘭秀朴元亮希春男梓嘉普  
旻通德即庶子泰晚季晚遇春男忠男同知應春女

郡守李大胤思春男潛僉知渚叅奉泳有文學不叅  
戊午庭請平官牧使慶春男大贊萬春男大茂有文  
行壬辰翼從昆季忠男大贊大男從郭忘憂堂倡義  
大承大新大振榮春男即大男曾玄以降至今十餘  
世冠下殆七八百人蓋其根固者葉必茂其源深者  
流必遠觀於子姓繁衍而積善餘慶不可誣矣請文  
者相大淇錫遠重也銘曰

居於家敦孝悌修諸身循規則豈曰無所遺考其基  
作我世德七子克家考孫支振振嘉爾旂胤之永錫  
我有文方直而不華千秋萬世考視此貞石

澗菴柳公墓碣銘 并序

嶺之陝川魯泰山西有坐卯而封四尺者故澗菴處士柳公諱希春字和伯氏之墓也公世簪纓有才學懿忠已卯之禍一隱終其身而不悔其清德高標為世思詠者久矣後孫淇錫具狀與幣北走八百里謁公記隧之文放不佞不佞辭不獲謹按公晉州人以高麗上將軍晉康君挺為鼻祖名公巨卿焉赫相望至密直司使僻隱先生藩當我朝龍興之日為勝國立節是公之五世祖也曾祖升滴祖德俱副司正考秀汀平海郡守妣安東權氏絜奉荇女 正德丙

寅公生于晉州元塘里穎悟好學不屑舉業嘗曰君子之學不過入孝出恭四字而已事親愛敬備至病致憂喪致哀無一毫勉強意北門禍作公無意在世等精舍於魯泰山下題曰澗菴植松菊以寓趣冷川朴文康公紹時寓南土聞公名行而造焉贈之以詩溪致其欽慕歎惜之意公和詩有功名場裏頓無心論道論文樂不禁之語因與之講磨從遊多在山寺朴公嘗曰到義理精微處難及柳君之高明又曰和伯吾黨中最純實人也嗚呼此可以見公學問德義之實也以 萬曆乙亥九月二十九日終享年七十

配南平文氏考禦侮世傑墓祔左舉二男四女男長  
杵嘉善次梅女長適朴士敦次柳世泓鄭仁著李希  
臯側出男奉晚季晚杵系男厚生女適執義申忠任  
校男景斗通政有學行女適徐駟迅叅議孫處恪鄭  
者曾玄以下不盡錄公爲學以庸學近思爲致知基  
本以論語孝經爲脩行謨訓早夜孜孜操守不貳性  
又純謹無疾言遽色一動一靜皆中規矩惜乎其嘉  
言善行不盡見於世也今欲收拾斷爛模象於數百  
載之後吁亦難矣按譜公後 贈獻納云遂爲之銘  
曰

晉陽華閭肇自勝國代有卿相克修厥德公緝其武  
早審發軔求古爲學知行兩進懲世斬伐肥遯無悔  
松風蘿月壽且樂豈知已有誰允矣治川一言之賞  
百世可傳曷不受報餘慶在後我勒斯銘用示悠久

磻溪處士魏公墓碣銘

并序

長興竹川祠曾享魏氏七賢處士磻溪公其一也八  
世孫瓘植賈狀及譜千里走書使其子啓龍來謁隧  
道之文余惟公之高風峻節鄉邦稱之何待愚者之  
言而爲重輕也謹按譜公諱廷鳴字叔謙長興人其  
遠祖高麗侍中苴珠其世系自侍中至閣門祗候种

凡十二代名宦達官大顯于麗其高曾祖禰承文習  
讀諱由亨叅奉諱晉賢進士諱鯤濟用監正諱德厚  
其外祖清州金氏諱忠信其生 萬曆己丑其卒  
崇禎庚午其墓山峴負乾之原其配仁川李榮仁女  
墓附左其一男東暉遵先訓有時望其二女全起堦  
李善遠其側男東暇其孫男世瑠世璉俱以文學名  
南州又按狀曰精神氣宇至溫而冰澈者公之天稟  
也曰文藝殆乎生知自免乳人稱聖童六七歲吟咏  
膾炙人口者公之天才也曰八歲讀小學於五倫善  
行不勝激勵感發之意各為劄記以自訟日飭飭自

強不已九歲不讀孟子而先論語致力而篤信廣取  
先儒及東方諸賢說究覈義理參證日用行事而思  
齊焉者公之為學也曰四書劄疑性理隨錄救急方  
皆述其自得之妙悟辭之微者公之居業也曰年未  
三十連占大小解額三十而當昏朝戊午廢 母科  
遂盡燒科程私藁場屋具歎曰以有母之子赴舉於  
無母之國忠孝俱困矣里名勝母曾子不入况科名  
廢母乎憤惋而歸者公之氣節也曰自此廢舉以窮  
經篤學訓誨子姪為至樂鄉鄰受業於門者日益滋  
焉其教以為已實踐為主者公之開來學也曰甲子

亂與伯仲氏及同堂兄弟募義赴勤丁卯應號召使  
金沙溪檄丙子聞 大駕在圍日夜慟心及李雲巖  
興勃倡義玉果公忻然應檄至論軍事言淚俱發觀  
者感激一軍倚重行至清州闕城下盟成痛哭而歸  
者公之忠義也曰結茅礪溪上謝絕世事隱約以終  
易簣前四日上書伯兄云顏曾之所以為顏曾以其  
得師於夫子也非夫子一貫之妙何從而聞之簞瓢  
之樂孰從而得之弟也不幸後夫子數千載之下生  
闕里幾萬里之外為學雖或顏曾而曰唯之對不改  
之樂誰聽而誰許之自知讀書以來心思力行若將

忘老年纔中身大命將迫吾道窮歟天理忒歟不勝  
孔懷之永訣且告將死之哀鳴又有傷感詩一篇其  
略云朶道斯有道由吾豈由人孔門追莫及何處質  
吾真學到幾層位金聲玉又振草廬英雄老枕席涕  
淚頻者公之不遇於時而慨然有千古不盡之恨者  
也蓋嘗論之公以豪傑之姿生于窮海之濱興起不  
待文王顧學惟在孔子其造詣之高下淺深固非後  
人所敢月朝而其志邁宇宙迹脫塵累嶄然獨立為  
士流之標準則誠希世間氣之人也惜乎有才而無  
命抱道而不壽竟未免湮沒於山野寂寞之間天之



篤生意果安在然其當彞倫敦喪天地翻覆之日集  
手扶義一心勤王以懲遺親後君之徒則公之樹立  
亦云偉矣其得祭社於百世也宜哉銘曰  
無伐其樹乎而無夷其土乎而嗚呼此鄉先生之墓  
乎而

成均進士金公墓碣銘

并序

故上舍生金公隱居茂長之扇洞孝於父母友于兄  
弟推之人屬義合庸言庸行蔚然有古君子風吾欲  
表而出之以厲夫文有餘而行不逮者謹按公諱養  
大字仲學天賦篤厚承順親意著自幼年纔省事患

無以為養告于兄曰吾當力穡以供水菽兄須儒業  
勉述家風乃躬幹家務百勞皆手執雖簞瓢屢空裘  
葛不完而甘旨未嘗乏絕前後喪哀毀踰制幾不能  
支而凡附身附棺必誠必信罔或泛忽其在內艱宗  
族咸謂其婚期已過親年又高宜從權行聘禮公不  
可曰竊聞諸長老身及主婚者無暮服以上喪可以  
許婚暮服尚不可况至哀乎且一縷苟延已是冥頑  
曷容諉以事情致壞禮防乎聞者咸歎服待庶母甚  
謹晨夕必省視事兄如嚴父大小皆稟命無敢自專  
嘗自外醉歸見伯公俟於里門因惕然警責終身無

沉冥子長將分居使二子別居而公則枕被同處至老不替家人進異味或衣服必問其進於伯公與否然後喫著之家人視焉常凡有進必先於伯公及喪年近七旬哀痛甚朝夕哭奠必躬參教養孤姪待其克家始委宗事遂寓高敞之道山公阜不育取從祖弟之子榮頤子之已而榮喆生不以已出而私厚使之別居居處衣食一任於榮與以沒世遠代墳墓並備儀物置祭田建塾儲書爲子孫宗族隣社羣居誦讀之資蓋其愛好人倫敦尚名義根於情性絕不爲風氣習俗所俯仰搖奪雖世之專門經禮者未始或

過故存諸中者誠敬而有本發於外者純實而無偽周旋動止可觀可則信在言前人自信服隱惡揚善聞義必服薄於自奉勇於賙急常戒子姓曰人家失和私貨其本婦言其次吾見亦多矣汝曹慎之此其事行梗槩也噫彼工文詞習威儀自命謂君子而入其室父子兄弟鬻鬻如者誠不知何人也子夏氏所云雖曰未學吾必謂之學矣者公實其人也歟金氏系出安東以高麗上洛伯忠烈公方慶爲遠祖歷至本朝左議政士衡有開國勳謚翼元傳至進士質教授景哲以經行忠義享祠道巖寔公七世以上曰

聖珍曰一行曰奎瑞曰振基是其四世並隱德不仕  
妣昌寧成氏以儉女有婦德公以 純祖壬戌生今  
上甲戌中司馬旋以優老典階通政卒於戊寅壽七  
十七葬于長城北一坊樓台麓負坤之原配丁氏籍  
靈光考昌基孝順柔嘉六親咸誦先公二十六年卒  
墓在扶安邊山大項里東麓巽坐榮爽一男常默三  
女適李承勳柳夾洲柳濟益榮喆進士五男重默應  
默純默鼎默慎默曾玄不盡錄進士君文行克家以  
狀徵銘於益鉉益鉉雖未及識公若其懿行實德之  
表著而不可掩者竊因士友而與有聞焉好德所同

不敢辭因叙次如右銘曰

人曰予知行則鮮能公姿純正默與道凝孝悌為本  
誠敬是將靡德不售後必其昌樓台之原有封四尺  
我銘不刊昭示千百

敦寧府都正崔公墓碣銘

并序

靈巖郡西牙山面白也里有墓庚坐曰敦寧府都正  
松巖崔公諱鎮夏之藏公歿之九十八年玄孫景烈  
千里緘書使其子基性來請墓碣之銘余嘗遷黑山  
海上猥撰公之事行矣今安敢以老病辭遂掇其大  
略而叙之曰公字君舉慶州人以 元陵乙卯生自

幼莊重有大人氣像稍長以忠孝自期事親常愉婉  
無違養志具甘極其誠勤嘗糞割指多有至行前後  
喪哀毀踰節塋祭以禮性坦率好讀書弱冠親迎著  
麻鞋挾周易以行早業功令屢舉鄉貢尤邃於經學  
其辨河洛理氣能默契濶透洛下士多推重而鄉秀  
之請教者甚衆甲午登文科由承文院副正字歷尚  
衣院典牲署主簿 溫陵令副司直三爲兵曹正郎  
再爲司憲府持平乙卯陞通政拜敦寧府都正官止  
曹司衛將其在郎署時有異趣人秉銓遣一朝士致  
意曰崔某若來見我清宦可得公嚴辭斥之在侍從

一心報國屢蒙賞典又嘗疏陳時弊 上嘉納之稱  
孝門忠臣永感以後無復世念於扶安順天二邑並  
辭不赴逮其晚來從宦特爲伯氏竹巖公之勸起而  
黽勉非公之素志也然一資半級不由捷徑爲子孫  
亦不屑於科宦更尋初服退老于靈之江亭超然有  
出塵之趣家無擔石少不介意庚申 大喪公病篤  
不能奔哭加朝服挽紳北向號寘翌年十月十八日  
考終于筭壽六十七崔氏顯自麗朝有諱光位諱宗  
浦諱逸俱官三重大匡僉議政丞八本 朝有永思  
亭諱亨漢官掌令燕山戊午極諫被禍諱松年官縣

監疏救靜菴趙先生柁公為十世八世曾祖錫馨祖  
聖徵考漫號月菴有文行妣光山金氏市西璇後也  
考某配淑夫人天安全氏爾錨女婦德咸備卒後公  
十一年祔于公墓下辛原二男德幹德洙噫公之嘉  
言善行悉於狀辭不必疊床而唯其氣宇弘毅志操  
堅潔以四勿九容為檢身之要法以三物八刑為導  
俗之急務出處進退素守確然義利邪正辨得甚明  
蔚為朝野之所矜式則可謂無愧於古人矣其視世  
之枉已循人迷不知返者得失果何如也此足為公  
不朽之寶也歟銘曰

月城華閥世有偉人公實胚胎質厚氣仁孝悌于家  
忠恪於國庸言庸行罔非矜式最所難能始終執守  
濁流滔滔人涉卬否荷衣蕙帶還尋初服位不極顯  
在公奚怍白也之阡穹然其石余作銘詩用警頽俗

愚村李公墓碣銘

并序

愚村李公諱儼字思仲其先慶州人中世有諱開封  
江陽君麗朝初貶為陝川郡戶長子孫仍籍焉清香  
堂諱源與退溪南冥為道義交松堂諱光坤於公六  
世若五世軍資監叅奉諱鎔諱廷男宣務即諱昕諱  
東陽其高曾祖禰妣清州韓氏西原府院君確后必

明女公自少慷慨有志節 元陵戊申安陰賊希亮  
舉兵叛遠近洶洶公謂事出鄰境憤不自勝即投書  
數亮罪因舉逆順之理曉譬聲言使鄰里親戚遠近  
上下無得移動又與從兄徵從姪宜馨暨梁重唐鄭  
熙運禹璋等數十人發文齊會校中以官軍義旅合  
力城守之意言于知郡朴師漢兼陳禦賊策七條時  
賊自居昌由咸陽將踰全羅界師漢料不能拒賊脫  
身往雲峯賊乘空衝將偽署郡守公從兄徵賊所畏  
忌者也遂大書假帖遣衆來迫徵曰此頭可斷此身  
不可污也踰垣而走公聞報即拔劍直前趕至潘溪

上斬獲數人而還於是圍束民丁整飭器械辦備糧  
餉建旗鼓諜直赴雲峯與河鎧禹洪善等防守要衝  
既而聞賊棄咸陽移屯居昌公以救援之意圖報之  
策力言於營將孫命大得射砲兵數百人迎知郡以  
歸且欲直赴居昌知郡不許公謂吾輩寧可受制於  
人緩夜赴義遂與約中諸人率衆赴省草峴登山再  
三大呼曰清州泰仁賊悉伏誅王師將斬希亮星夜  
來到耳因放起號砲以張聲勢未幾熊輔崇坤希亮  
次第就縛即四月初四日也蓋公當國勢岌嶮人心  
危疑之際倡率多士呈書討逆超然拔出於列郡風

靡之中建七條之策斬假署之賊收復既陷之州郡  
者固人所難能而終之炳幾沉美破賊人之胆使之  
束手歸命則原其功烈又不在折衝禦侮之下也御  
史朴文秀見推以萬代瞻仰政在斯矣按覈使吳光  
運別單啓稟令該曹特別調用而事未施行人至今  
恨之其生以 明陵丙寅卒於 英祖庚申葬在郡  
西竹谷里坐壬之原配南原梁氏九拙菴喜玄孫知  
中樞府事錫命女一男宜奎一女適士人全墜宜奎  
一男說說二男龍全寅全以孝行 贈童教餘不盡  
記六世孫炳憲以狀來請銘銘曰

蕩平朝議是非莫別霜冰漸積禍亂猝發噫彼小賊  
敢讐 天日風習所牽向背靡適公乃奮義厥立孔  
卓竒正出謀蔚有可述其誰與我同志六七瞻茲竹  
谷衣履攸託刻示阡途過者其式

成均進士南溪金公墓碣銘

并序

寶城郡別谷坐卯之原馬鬣而封者南溪金公諱珽  
字公瑞之墓也公以 嘉靖丁亥生天稟秀異七歲  
賦詩多警語及長博學善文章二十九中司馬試考  
官鄭林塘惟吉見其文亟許以咸唐體格旣而從先  
生長者遊如金河西梁松川金月峯諸公皆酬唱往

復樂與爲友性至孝常漁釣以供甘旨親齋斫指進  
血及喪廬墓哀毀三年如一日 穆陵壬辰 大駕  
西遷鄭松江李忠武諸公要與同事公謂今日事體  
宜先勤 王與弟進士玖徒步二千里扈 駕至龍  
灣癸巳正月聞天將李如松收復平壤呈詩曰仍知  
嚙指心猶動誰道唇亡齒亦寒天將見而壯之賜衣  
履糧資事定歸隱海南之西浦杜門謝客潛心性理  
尋移長興之帝巖山下手植三槐爲講肄之所日與  
會心人討論經史不知老之將至沂川冠童亭觀魚  
臺皆杖屨逍遙之地也享年八十七而以 萬曆癸

丑卒蓋其篤於君親高尚志事素性卽然非勉強可  
能惜乎以若公之德之行終老林樊不得見用於世  
豈非所謂命歟遺稿盡失於兵燹僅有收拾若干篇  
藏于家金氏系出光山以新羅王子興光爲始祖麗  
朝益昌大文安公良鑑文肅公周鼎忠肅公浚最著  
入我 朝有諱瑚文科吏曹參判寔公高祖曾祖諱  
自庸漢城參軍祖諱簡直長考諱仲謙參奉妣清州  
韓氏考處士處權配金氏籍清風考參奉遵仁馬氏  
籍長興考縣監應台男澤南式南並參奉女郡守金  
允明金氏出女進士朴樾宇士人金光範張縉安孝



閔馬氏出澤南男華彥 贈司僕寺正式南男華佑  
華俊文科縣監華伯生員 贈戶曹叅議女進士韓  
協士人朴益亨辛丑曾玄以下不盡錄來請銘者十  
世孫貞煥也銘曰

冠山之北一畝宮節孝文章有斯翁 乘輿蒙塵痛  
不窮白衣奔問輸丹忠尺寸効勞總紀功遂令志士  
老蒿蓬觀魚臺上四尺崇我作銘詩樹之風

知中樞好德齋文公墓碣銘

并序

緩州之白巖故有孝如王延福如汾陽隱居行義如  
董生而名聲自聞人爵從之者曰文公好德齋諱永

國是已公生於 元陵丙申十二月十日沒於今  
上庚午七月二十五日壽九十有五凡鄉之人士知  
與不知皆咨嗟相吊曰善人亡矣越二十有八年丁  
酉公之孫明煥千里緘書具狀與幣謁其隧道之文  
于余余病不任筆硯辭既久請益勤則遂按狀而叙  
之公字士良文氏系出南平自新羅武成公多省始  
顯于勝朝者曰忠肅公諱克謙江城君忠宣公諱益  
漸純質公諱中誠入我 朝景惠公諱和敬肅公諱  
尚行縣監勉修齋諱自修叅奉諱昌後最著高祖世  
輝生員曾祖命吾 贈掌樂正祖喜孟 贈叅議考

弼鎮 贈叅判三代封秩皆以公故妣興陽李氏馨  
久女光山鄭氏彥僑女也公生而端正遊嬉異凡三  
歲丁外艱長奉偏親愛敬備至母病思生魚公泣求  
竟得歲儉負米百里外時郡邑皆閉糶無賴輩欲攘  
公負公辭氣愿款反得護送癸未母夫人棄世哀毀  
幾滅性將卜葬地三處各書山名坐向伏靈筵心祝  
抽一用之乃上佐山也晨夕謁廟朔望展墓值喪餘  
夙齋戒常如袒括平居對魚肉輒愀然曰昔吾親甘  
旨未能充也今雖欲養而親不在我何忍恣食此物  
耶事二兄如嚴父湛好孺樂無不備至嘗患家貧失

學駕牛適野見行賣三經者即以牛易之有穿窬者  
追見於山谷中以理論之盜感悟負納所掠輒以數  
緡錢與之常戒子孫曰不侮窮文不著華麗勿嗜酒  
勿博奕節用勤儉於士於農各專其業勿以富貴為  
心但世世有孝子孝孫是吾願也又曰近來學者徒  
聘詞藻而無本實輕躁浮誕喪其良心反不若不學  
而全其所賦之德也當懸弧招集象子孫賦詩或有  
辭意過正者公正色責之公自少至老未嘗有疾言  
遽色有強梁人見而退曰某丈座上都是和氣觀其  
容聽其言不覺私邪自消乙丑以大耄特除五衛將

又陞嘉善戊辰超授崇政知樞以鄭相公元容奏公  
祐考則百之盛故有是命及疾猶上父母墓哭拜  
而歸實屬續前一日也臨歿命子孫列坐曰汝等勿  
忘乃祖平日勸戒旋命扶坐開北牕望墓哭涕流沾  
席呼母者三而終嗚呼若公可謂終身慕者也塋同  
福司馬洞乾原夫人光山金守儉女有婦德克配君  
子八旬偕老乙卯春行回香禮翌年卒墓合附生五  
男一女邦休翼休鳳休過房副護軍晚休景休梁禧  
永邦休三男三女致煥時煥康煥高濟尹羅賢集柳  
錫龍翼休二男明煥炳煥鳳休四男三女璟煥進煥

達煥奎煥崔相翼閔泳祚李根會晚休四男三女日  
煥錫煥參奉瑋煥克煥高萬柱崔東鎮柳炳基景休  
二男三女魯煥禎煥崔洛殷柳永琪柳雲漢曾孫男  
載豐載轍載卿載鶴載勗載曾女曹駟承金燮尹喜  
聖鄭在九致煥出也男載德載琰載頊載珣載灝時  
煥出也男載豹載殷載駿女林炳春朴性柱康煥出  
也男載晉載秀載純載咏載渭女高永柱高濟圭朴  
岐陽明煥出也男載東載軾載熙女林應圭炳煥出  
也男載弘女朴玩柱吳進洙璟煥出也男載魯女林  
德圭進煥出也男載普載尚達煥出也男載咸載昌

載浩奎煥出也男載厚載惠載冕載旺女柳炳翔日  
煥出也男載淘載澤載煉女趙完燮錫煥出也男載  
義載禹女柳喜源璿煥出也男載喆載烈女柳渭植  
克煥出也男載絢女梁吉默朴昌煥魯煥出也男載  
聲禎煥出也竊嘗觀人各有所好好爵好貨好名好  
文章其所好雖異而其為利則一也惟好德者不求  
利而自無不利自天佑之申命用休斯義也著於大  
易及夏禹之謨今以是而蹟公平生其不曰庶幾近  
之者歟詩曰孝子不匱永錫爾類又曰宜爾子孫繩  
繩兮言好德之流於遠也君子於是乎又知公子孫

之必昌也銘曰

仁必有壽善必有慶天理不忒於公可證爵彼佳城  
賢配同藏我述其德揭此銘章

學生李公墓碣銘

并序

公姓李諱燦東字彥明生以 純祖丁丑卒於 哲  
宗癸亥今延安府南距長峴負丙而封者即其墓也  
安城氏其先著自三韓高麗按廉使元長寔為顯祖  
傳至密直副使諱惟仁我 朝開國守罔僕之義累  
徵不起歷大提學總承旨遜修義副尉昌門至僉正  
諱坤壬辰 西狩扈 駕立愷有子馨蔚以文行薦

授童蒙教官號愛蓮堂是七代以上曰墜曰鎮純曰  
重寅曰瑞七高曾祖禰四世妣安氏張氏公即張出  
公自幼有至性才得善果不先入口年十餘丁母艱  
顏色之戚哭泣之哀邑為鄉里所稱賞父得河魚疾  
醫窮幾殊公衣不鮮紳夜不交睫禱展嘗糞一如黔  
婁之為臨絕血指延三日命及喪哀毀踰度蔬木苦  
壘動遵禮制新阡距本家數里每晨昏展省不避雨  
雪三年如一日其拜跪當膝處穿而成坎既闋因構  
小屋而居焉蓋愛其靜僻便於朝夕瞻望松楸也左  
右圖書意想蕭灑傍有小塘列植花卉每花朝月夕

杖屨徜徉吟哦上下若將終老遠近人士過其前者  
皆歎息指點曰此孝子洞也若其奉先必誠教子弟  
以義尤以開進後學為急務者皆可見公敦行之實  
也夫人開城高氏敬淳女孝順柔嘉有女士風卒後  
公十四年墓合祔有一女適士人劉秉穆系子慶龜  
孫男錫英過房次瓚英朝英發英學英達英豐英女  
趙泰亨曾孫男文相俊相興相廷相餘不盡錄錫英  
走其子殷相致書不佞曰吾從祖邃行懿德誦在鄉  
邦極有不可泯者而顧誠孝淺薄墓無顯刻殆三十  
年餘矣願丐一言而表之余不敢以老病辭序次如

右繼之以銘曰

相時役役外重內輕敦孝務實公實天成有降者魄  
宅茲鮮原尚篤其慶永垂後昆

訓練副正李公墓碣銘

并序

故壬辰原從功臣李公德祥以親上事長之心有勤  
王討賊之勞參盟帶礪樹立偉然今鎮海縣東道萬  
里負西四尺而封者即其藏也謹按公字仁禎考

顯陵叅奉健妣金海金氏哲女祖宣禦侮將軍曾祖  
晉繇孝寧大君靖孝公補其九世祖也 隆慶辛未  
仁祖甲申其生卒公風骨俊偉膂力絕倫不屑博士

業從事弓馬 萬曆辛卯登武科為守門將翌年壬

辰島夷荐食中外波蕩叅奉公謂 君父蒙塵安危

在即為人臣子奮義敵愾此其日也勿謂我衰癯努  
力向前毋或越趨公遂同兄奉事雲祥從兄府使

祥晨夜疾馳赴留都大將李陽元寨旋即扈從至龍  
灣及平壤之戰隸屬天兵有殲賊功事聞除訓練副

正 大駕還都乃陳情言臣家在嶠南蕩為賊藪老  
父存沒未可知願蒙 恩暇庸伸私情遂還山終養

以沒其齒追錄原從勲噫此忠臣於孝子之門者尤  
其信矣乎配淑人晉陽鄭氏全材女男之新孫時昌

曾孫漢杓漢楨漢楫漢灃銘曰  
惟孝與忠性之全德公實兼之俯仰無忤睠彼鮮原  
有藏者魄刻示穹石後人之式

梁山廉公墓碣銘

并序

廉氏寶城望族本支繁衍名義相承其中世有梁山  
公世慶以忠孝聞著沒而祭社後人詩曰勇驅義旅  
思殲賊孝感凶會幸庇親此實紀也塋在栗於面慈  
毋山負已之原墓久無刻後孫等相與瞻掃愀然興  
感曰歲月滋荒不可使後人不知是祖之宅也以故  
承政院注書任公興源珩為狀屬余為金石之文竊

詳公字由善其先瑞原人譜自高麗太師孝文公信  
若再傳至曲城府院君愔臣出入將相身佩安危五  
十年事行功業俱在李牧隱珩撰神道碑於公為九  
世縣監緯副司猛慎孫 靖陵叅奉浩僉樞寅高曾  
祖考四世外祖判官寶城宣重倫公天姿秀凡才上  
學致疑發問多出人意表及長能知事親之節甘旨  
之供定省之節罔或少懈父嘗患濕疾臥起須人自  
進食湯藥以至溲便諸節皆躬執其勞不替他人患  
疽彌月孔劇乃吮膿五晝夜竟得差完至壬辰倭警  
赴義兵將任公檄召叅謀籌畫料賊制勝蔚有勞績

丁酉再發負父逃亂晝伏夜行備經險阻每值峻坂  
必以繩索自繫其腰使所從奴子引曳而上如是者  
非一再卒遇賊進退路沮輒涕泣乞哀言寧可殺我  
毋害我爺辭氣愿款賊乃舍之而去遂得俱全此皆  
狀辭所錄噫前言未有仁而遺其親未有義而後其  
君若公可謂不失仁義之性者而黔婁江革不獨專  
美於前矣配長興任氏考即牧使啓英育五男一女  
男長梯立武科訓練僉正次時立誠立丙子舉義允  
立僉知中樞秀立副護軍女寶城宣櫓孫曾不錄丙  
戌十月二十八日卒距其生 嘉靖丙寅享年八十

一銘曰

丁板蕩之時而志在衛國冒蛇豕之衝而孝克全親  
豈惟無愧於天地抑亦可質於鬼神彼四尺者君子  
攸藏母或夷之視此銘章

成均生員崔君墓碣銘 并序

嶺之逸士有孝梯通神明忠信及豚魚有文有質蔚  
然為東都重輕者故上庠荷史崔君是已謹按君諱  
晚善字聖謨慶州氏始自新羅歷麗迄我世有偉人  
穆陵龍蛇之役貞武公為國殉身貞武第三子諱東  
亮蔭縣監號松亭於君八世以上曰宗律進士曰彥



敬號南岡曰祈永生員號龍菴曰世龜生員高曾祖  
彌四世外祖驪州李在元同樞世彬貞夫人驪州李  
氏宗祥女其所生考妣也君以 憲宗辛丑生自幼  
有至性及其移天年纔十二事所后母如所生生養  
死哀誠意惻怛極有感動人者今 上丙子登司馬  
試時倭為西洋前矛逼境要盟國論攜貳而和事作  
君絕意進取東裝南還若將終身既而世母伯兄相  
繼淪沒二姪尚少君乃攝理家事身親燥濕轉危為  
安待丘嫂極其尊敬每日整衣冠問訊起居大小事  
必諮詢或有持難底意思輒反復開陳待印可後施

行訓子姪有法度每夜分靜坐召列於前諭之以古  
今人嘉言善行欲其服膺而效則奉先焉著存不忘  
睦族焉任恤為急值大歉待而舉火者數十家自奉  
簡薄平生身不著綺羅居不蓄異物矣風儀善談論  
聽之亮疊使人不倦揚善揜惡口不雌黃而至義理  
大關去處輒凜然有不可奪者由是聲聞洋溢搢紳  
縫掖坐客常滿而類泛應曲盡得其歡心同樞公九  
莖康寧雖在異宮志物之養始終如一與同母兄友  
愛甚摯至老不衰其餘細行片善有難枚舉此其狀  
辭大略嗚呼今日何處得來以己亥七月晦考終于

寢墓在松林負庚之原前後配並驪州李氏女李錫  
彙李績父進士李鍾文前配出男鉉澈鉉泌女李錫  
圭後配出銘曰

士修於己不必其施惟厥孝友衆善之基有美林泉  
安此適芳節要一帙玩晨夕兮循始迄終由天爵兮  
凡百君子視此刻兮

同副承旨鄭公墓碣銘

并序

公諱鍾岳字舜四晉陽人自高麗吏部尚書文良公  
乙輔始三傳至平章事璜勝國末以直道忤旨謫武  
寧郎南下中祖宣廟朝有上舍生希得值丁酉再

變與兄慶得被俘三載全節而歸號月峯者其八世  
也高祖晉燁曾祖得彪祖沃考驥奎並以孝友文行  
著名妣南平文氏道貫女以仁陵己卯二月十八  
日舉公于槐亭里第稟姿殊絕年才就傳涉獵經史  
日誦萬餘言旨義肯綮隨問應對無所凝滯長老咸  
以遠大期之哲宗戊午登明經科由成均館典籍  
歷司憲府持平文臣兼宣傳官司諫院正言吏兵曹  
正佐即乙丑除自如道察訪政有異績蒙兒馬賜  
典瓜遞陞掌令庚午為高山察訪例兼咸定兩邑教  
養官至即勸獎士類丕變文風大小公廨並捐俸修

葺其中望雲亭乃故持憲朴泰維戀其夫人追慕狄  
公太行故事而初建者民國無關公以離遠千里爲  
其志事之偶同也並加繕完其好古務實有如此者  
已而由獻納司諫陞奉常寺正丙子三月選文臣重  
試特加敦寧府都正歷兵曹叅議至同副承旨壬午  
難定公謂此正懲毖思治之時且登科二十餘年歷  
啟臺閣滾躋緋玉而報茂絲毫寔余之恥遂疏陳勉  
聖學答天譴節財用崇正學惜名器立紀綱嚴刑政  
七條時務而於宋先正華院復享事尤三致意焉  
上優批嘉獎癸未除慈仁縣監歲適大歉民皆荷擔

公輒盡心購恤如病在己禁子弟不得入官舍嘗言  
儉者持身之基約者全家之本汝等念之此其居官  
莅民之大畧也至於御家有法度處兄弟盡友愛奉  
先以孝宗族焉致其敦睦鄉黨焉待以誠敬文辭也  
平易雄渾有作家氣味蓋公自釋褐以後恨不得專  
意讀書每公退家食誦念舊讀到老靡懈語云仕優  
則學學優則仕其公之謂歟以乙酉九月干支終于  
咸平居第壽六十七計 聞別賻如例始塋平陵面  
天柱峯後移柩洞負亥之原配淑夫人豐山洪氏通  
德卽必鎮女事舅姑以孝待君子無違禮男長復源

蚤卒季觀源女辛徽常李永祺觀源男成根過房判  
根龍根女奇斗燮次未行銘曰

晉陽之鄭世傳名德猗歟月峯厥樹磊落傳至于公  
挺乎其材戰藝國庠遂捷大魁柏府薇垣騎省出納  
平步從容以承 罷渥晚值陽九國步抗捏匪躬蹇  
蹇王臣之節雖不見施俯仰何忤有文有行有苑其  
萃柘洞之麓有碣峨峨有來百年公名不磨

滄洲鄭公墓碣銘

并序

公諱光洲字止叔滄洲其號也鄭氏籍河東譜自高  
麗密直副使國龍始入我 朝以道學淵源忠孝閱

閱望于國中一蠹文獻先生諱汝昌其五世祖也考  
曰弘緒師事寒岡鄭先生先生亟稱大賢有後登文  
科官至成均館學正號松灘娶南原楊氏兵曹正郎  
士衡女以 萬曆庚子舉公于介坪里第聰明仁孝  
卓越流輩嘗受學校朴公文模時年才十二器局已  
就詩格精敏朴公呼韻以采石月訪謫仙為題公即  
應聲云清江不改古今流白石蒼苔兩岸秋悵悵謫  
仙歸去後獨留明月向人愁朴公亟加歎賞壯其夙  
成經史子集無不探賾微辭奧旨迎刃而解雖老師  
宿儒皆從而講問焉癸酉中進士與伯兄蒙泉公同

捷一榜時人榮之乙亥遊太學時館中將疏請栗生  
二先生從祀嶺儒率多立異公與朴上舍以肅定議  
聯名戊子丁外艱伯兄繼歿哀毀踰禮先後塋祭一  
從儀節教養孤姪以至成立乙未朝廷以累舉不第  
特拜黃山道察訪莅職勤敏郵卒頌德家素窶蔬糲  
不給而處之晏如平居恒終日看書或至忘食其所  
潛心玩繹到老誦數而不懈者多在易繫及朱書凡  
宗儒俎豆及闡揚懲艾之文士論咸歸屬焉乃以丁  
未十一月日考終于寢塋郡南血溪壬原配密陽朴  
氏禮曹參判明樽女先公二十五年卒墓祔左有三

男三女長世模生員次世楷次世植梁用濟梁鎮  
南房世望婿也側室男世禧女鄭再豪孫男道兼達  
兼女姜錫齊梁漢祺世模出熙道熙運女朴壽泰世  
楨出曾玄不盡錄後孫在櫓爲墓尚無刻扶老踏躄  
北走數百里論於不佞嗚呼跡公平生志節正大論  
議慷慨好德尊賢有不可掩者如此苟非汲資乎學  
問之力其孰能之至其持身御家日用動靜已有陶  
菴李文正先生撰狀發揮殆無餘蘊則誠不容外人  
架疊而可傳之久遠矣謹叙其大略如右銘曰  
天挺文獻佑我大東亦粵松翁克述家風公襲前光

養真林壑孝友文行多士矜式謹嚴規距卓犖操節  
督郵一命有何損益有爵佳城呵禁樵牧刻辭于阡  
昭示千億

靈巖郡守文公墓碣銘 并序

此綾州牧南真谷長燈負已而封者故靈巖郡守文  
公澣藏後孫錫魯使其族孫濟敬具書與贄來曰我  
十二世祖郡守公僅得諱爵而字號生平從宦履歷  
暨事行首尾少不槩見由是以往則將與其體魄所  
託而並就泯沒勢所必至將立石以警樵牧願責一  
言使後嗣子孫有所考信甚大惠也余謂文獻斷續

古今通患夏殷之為帝王大家而吾夫子已歎杞宋  
之無徵况其下焉世代綿遠重以水火兵燹流寓遷  
徙之反覆無常而篋笥所傳難保其十分無恙只當  
疑而傳疑信而傳信庶其為寡過之道乎遂叙其世  
系子姓如右文氏籍南平譜自新羅南平伯多省始  
傳至江城君益漸有倡明正學衣被東民之功曾祖  
尚行禮曹叅議祖穆光州牧使考自修谷城縣監享  
三賢祠妣晋州河氏兵曹判書演女公之事實他無  
可據惟居家盡孝友居官著廉勤處鄉黨交朋友一  
以誠信者為流來口傳噫亦可以知公也配淑夫人

完山李氏墓前  
三男孝元孟元並副司直景元進士孝元男長侃習讀次允承技承孟元男健部將儉進士卓部將次佑從季從山從以從萬從冠從曾孫弘濂主簿弘洛副司正石生訓鍊判官甲子赴義錄振武原從勲於經叅奉弘獻進士壬辰殉節晉州贈持平配食褒忠祠弘猷進士玄孫大承宗簿寺直長瑱叅奉五世孫以寧叅奉渭掌樂院正七世孫道東進士八世孫演模進士晉燁進士鳳翼文科禮曹叅議九世孫始龍文科承文校檢十世孫範龍進士十一世孫命圭孝友文行聞著鄉邦屢入薦狀鳳休

敦寧府都正慷慨有氣節繼繼承承蔚有可述古所謂黃流不注於尾缶福澤不降於淫人者尤可信也  
銘曰

江城顯閎望著南服平陂百年世傳名德公又趾美薄試字牧上有所傳下有所託真源之麓有穹其石我作此銘用垂千億

鳳山居士文公墓碣銘

并序

不佞與文君達煥善習聞其家世孝友望于南服日以狀來曰我曾王父懿迹合有可書者丐一言表諸墓隧謹按公諱顯相字乃慶自號鳳山居士文氏籍

南平以麗朝三憂堂益漸為顯祖傳至禮曹叅議尚  
行始居綾城再傳至谷城縣監自修鄉士俎豆之是  
十二世若十世曾祖咸周判官祖聚東考演鼎妣濟  
州梁德園女舉六男公居其長生 英宗庚午卒  
純祖丙戌葬在飛鳳右麓負壬原公自少風神傾偉  
有長者氣象事二親殫誠力及喪哀毀盡制平生口  
不道雌黃迹不近城府日必冠帶諱服經禮人有以  
疑文變節來問者輒斷之以先賢定論持身謙恭御  
家勤儉處鄉黨敬而信訓子弟有法度嘗言道理在  
我求乃可得富貴在天非力所致又謂與其多言而

少實寧寡言而近愚者庶幾寡過又謂忿怒難制輒  
處之以忍急遽易失須運之以思又謂處世如行路  
只從平坦底做去不可行險而徼倖每歲熟必先封  
正供別貯淨處曰為民奉公當如是也蓋其遠德懿  
行可謂不售蘊玉而非世人才有一能寸善汲汲求  
術者所可彷彿宜其士林悅服屢呈營邑一辭推之  
以鄉先生而無間然也夫人驪興閔氏通德即道斌  
女婦德甚備先公十一年而卒墓合祔一男五女男  
範龍進士女林紀漢李壽罔曹一聖李儒煥李基興  
進士無嗣以族兄知事永國第三子都正鳳休子之



女李復圭奇東赫朴東英都正四男三女璟煥進煥  
達煥奎煥女崔相翼閔泳祚李馨會曾玄不盡錄銘  
曰  
淡榮利安窮約敦六行無不足彼嵯峨飛鳳麓四尺  
封乃其託

成均進士文公墓碣銘

并序

有封若堂於飛鳳右岡者曰故上舍生文公範龍之  
墓塋近六十餘年士林誦之不衰詩曰愷悌君子德  
音不已其是之謂歟竊詳公字洪瑞即鳳山公顯相  
之胤擣梁庭訓潛以聰穎自學語授字記性絕人及

長豪逸有氣力能折節讀書經史百家舉融會貫徹  
靡有疑滯功令詞章乃其餘事二十七中司馬鳳山  
公浚欲其因是大闡為門戶計勸之北學公居泮十  
餘年磨礪潤色文藝聲價為館中諸僚所推重顧不  
利有司乃退而家居孝奉二親養致樂病致憂喪致  
哀無愧古君子為者制閔輒謝場屋專精問學深造  
自得或發之文詞其曰貴如可得人謹賤心不能欺  
理自明又曰靜室獨坐心為嚴師氣溢則驕禍生於  
忽酒是狂藥無多酌口是禍門無多言忠孝至路人  
稱譽暴怒作家人亦踈云者類朴實悃悃無雕飾態

每晨謁家廟朔望首先塋薄於自奉喫著與少者賤者無異同敦宗族禮賓客處鄉黨信實相與不以存亡易心性簡少許可遇賞心人款款傾倒見側媚不正者若將浼焉鄰里間有疾病死喪藥餌慰撫務盡吾心至其謂使今日士類略識尊攘大義而不失秉彛之性皆斥和諸公扶植之力云者則論議向背之正尤不可誣矣惜乎世鮮知德未展厥施而坎壈以沒也公生于 正宗己亥卒于 純祖癸巳年僅五十五夫人昌寧曹氏允福女世系子姓俱載鳳山公墓碣茲不復贅銘曰

文為大姓迹自江城純質景惠代有厥聲傳至于公姿挺俊良少年戰藝遂捷上庠鵬程驥步庶幾立揚抱珍不售身已沈病壽不耳順何其短命鳳麓峨峨是公所託刻詞于石警彼樵牧

繕工監假監役梁松圃翁墓碣銘 并序

翁諱俊默字敬心松圃其號也梁氏籍濟州歷羅迄麗世有大官入我 朝學圃先生諱彭孫有己卯名蹟享靜菴竹樹祠其十二世顯祖 贈承旨諱準漢贈叅判諱潤伯諱再永諱龜模是翁四親妣昌寧成氏考匡源後利川徐氏考英浩翁自出也翁早孤家

素貧攻苦食淡帶經而鋤奉偏慈極志物之養迎孀  
姊同衣食三十年無間繼后分有以立其家訓飭子  
孫必以義方不出耕讀二事之外致力田畝勤而不  
置晚暮收效頗有羨餘賙恤貧窮不待有聞飲助婚  
喪恒若不及先墓石儀祭田並躬自擔著不委之族  
理家勤儉規模井井居鄉敬慎不失尺寸持身以正  
宅心以公譽不色喜毀而無辨此其事行大畧所得  
將作一命非素志也嘗命子赴舉戒之曰近聞科弊  
濫觴舉子輩挾司諤換封疊券無所不至士習解弛  
實非細事汝須慎之無為李君行先生罪人也以

當子壬辰考終于寢距生戊子為六十五塋道林面  
三台峯友原從遺命也配河東鄭氏同樞承烈女三  
男長在慶次在善在基三女適曹鶴淳文達煥李毓  
采孫曾不盡錄在慶不佞晚交也以狀來請銘余於  
翁雖未及類槩知其以醇懿之姿務拙篤之行推諸  
孝友而盡任恤之道者也是可銘也已銘曰  
竹樹之鄉雙峯之里有頌碩人寤言永矢孝友青蓮  
詩禮素履各行所推鄉稱善士厚德享報肖孫賢子  
我銘其蹟以詔永禩

西巖居士鄭君墓碣銘

并序

念昔巳卯之歲余還自海上止宿于光州河南士友  
全集中有鄭君道源字貫一乃蘆沙奇侍郎鼓山任  
祭酒二先生門人溫雅愷悌知其為故家典型而倉  
卒穉中未及款也後二十餘年有纍然曳衰而入門  
者迺君之子桓斌也因泣道其父事行曰吾父篤於  
內行居喪不肉臨祭致敬口不道雌黃足不近城府  
所尊閣對越而朝夕從事者不越乎四子心經近思  
等書甲午乙未之變象皆瞠然不知為計吾父謂東  
徒是西學變名完髮只有一死字或作文討斥或揭  
壁自警鄉里信從者眾不幸以巳亥某月干支終願

吾父幸得一親於公願得公一言以資墓道則吾父  
之幸也噫君少於我八歲宜君哭我我乃哭君俯仰  
疇昔何忍辭為按鄭氏籍晉州譜自高麗平章事乙  
輔始傳至侍講院說書晟說書之玄孫休東隱居七  
峯山下亭扁以百花者故相元文簡仁孫所命也於  
君為五世曰鍾兌漢鎮珪考祖曾三世外祖錦城吳  
燮 憲宗辛丑即其生也塋在亭左負丑之原夫人  
吳氏相英女籍錦城四男桓斌桓周桓石桓相孫男  
鳳烈鶴烈長房出鳳錡鳳時二房出正烈三房出奇  
烈季房出銘曰

嗚呼教之易俗考衆惡異而喜同也惟吾志之有定  
考誓不變乎始終也嗚呼如君考將來諸古人之中  
也

竹窩金公墓碣銘并序

公諱龍秀字德順竹窩號也金氏延安大族其居南  
原自別提順禮始子晚隱璧以壬辰軍功 贈判決  
事孫履水齋承朴監役不仕俱以忠孝著曰宅延曰  
應範曰露淵曾祖祖考外祖慶州李東浩曰塹湖南  
原梁氏其本生考妣也生於 純祖丙子幼丁父憂  
哀毀如成人及長躬勤于職養極志物事所後父母

一如所生有疾嘗糞禱辰及喪哭踊盡禮朝夕常至  
墓所拜跪號哭並無愧古人為者讀書以小大學中  
庸為平生程潛思默會有得便劄記記之不足又  
圖之造化性命之源學問進修之方瞭然如指掌當  
時宿德如蘆沙奇公白溪金公並見許可自奉儉約  
衣取掩身食不兼味對後生小子眷眷言孝悌忠信  
以至立宗規設洞約明賞罰正民俗蓋亦有倣柁范  
文正呂藍田古事嘗過長城珍原暮寓旅舍當夜主  
女好言善色冀欲薦枕公嚴辭却之及其不聽而強  
之則便呼隸驅出其翌厥夫致謝曰公真君子人歟

又有穿窬者公若無知然慙慙招而前之反復曉譬  
冀其自悟因與若干錢米以歸之後有人載酒納拜  
曰賴公教誨革面至此敢不來賀者此其狀辭大略  
享年八十以今 上乙未卒臨絕呼子孫等語不及  
他事惟以孝父母友兄弟禦外侮守門戶三致意焉  
噫孟子所謂可欲之善有已之信公真其人也歟葬  
在府北魯山下柳川負西之原夫人全州李氏允植  
女閨範甚懿配君子無違先公十八年而終葬于末  
川坊後洞村後良坐之原生二男二女長思昇次思  
燮女適柳道馴次適金允祺孫男命基女崔成鳳長  
房生憲基次房生以下不盡錄銘曰

近城華閣望于南服公襲前光稟姿孔哲曾思遺篇  
三復無斁浚造自得非傭耳目十圖發繳彷彿闔域  
後來承承庶其克擴

贈司憲府持平安公墓碣銘 并序

辛壬黨禍之餘陶菴李文正退居龍仁之寒泉以諱  
明斯道爲已任中外士大夫遊其門者皆有以聞夫  
下學上達爲己求仁之節次階級而交修互資蔚然  
有蕪湖諸子之風焉時則有若誠菴安公以聰穎近  
道之資兼博聞強記之工贊見之初先生亟稱以洛

下高士又錫之嘉號而與謙齋朴公大齋俞公為道  
義之交然則公之造詣豈易言哉公諱震馨字子芳  
安氏貫順興以神虎衛上護軍諱子美為鼻祖傳至  
諱軸官集賢殿大提學諡文貞歷文簡公諱宗源良  
度公諱景恭靖肅公諱純大司憲諱崇孝世有名位  
勲德為東方顯閥其後有諱混號宜休堂官吏曹叅  
判諱節翊衛司翊贊諱汝止逸叅奉並從師名賢德  
學著世寔公高祖以上曾祖諱槩司直祖諱後遷弘  
文正字考諱徽奉事妣密陽朴氏叅判琬女公志尚  
遠大早謝公車專門此事嘗以為聖賢可學而天下

事皆吾分內也自經子以至洛閩諸書靡不致力於  
大學一部謂以天德王道之要而用功最深平居以  
持志養氣為修省節度恒言志不先定則動極必亂  
氣不素養則靜久必昏惟其有定也故動而能安惟  
其有養也故靜而能活欲動靜不失其正則必以誠  
敬為本又謂日用不知之民有下必甚焉之善苟不  
開牖振作之則無以激勸人情丕變流俗於是考證  
藍田鄉約條例與石潭先生故事叅互損益著為節  
目簡易明白可行無弊蓋其自治縝密咸水不漏均  
是物我用意懇惻有如此者至若事親盡孝奉先以

誠居家謹嚴持身清苦日用云爲泛應曲全在公即  
茶飯物事也所居黔陽之北城市稍遠泓淨幽邃有  
泉石之勝每花柳佳辰攜二三子逍遙徜徉詠志觀  
德嘗有簞瓢陋巷慚顏樂春服沂濱慕點狂之句其  
存心物表氣像坦蕩顧又何如哉而天齋遐年不展  
厥施斯爲後人之恨也所著有三才合應圖四書撮  
要藏于家其生 肅廟丁卯卒於 英祖癸丑葬在  
衿川松洞坐卯之原 純祖庚寅朝廷用士林言  
贈司憲府持平配 贈淑人全州李氏洗馬宰夏女  
閨範貞淑治家有法度墓同原衿左男墳墳墩女李

彥祥沈斗浚墳男宗赫墳男宗喆墩男宗華宗說宗  
赫男廷賢宗華男廷壽廷壕廷吉廷徹宗逸男廷元  
玄孫以下不盡錄請銘者廷壽之男琦良也琦良博  
學好古筮仕至司憲府監察子漢登司馬尤見餘蔭  
之未艾也銘曰

先民有言養氣持志誰能服膺庶不疑貳公由師承  
妙契厥旨于誠于敬誓無失墜導民善俗亦云我事  
而厥根本鄉約是自藍田石潭奚獨專美修明潤邑  
可舉而試有隱厥居于黔之陽楊風梧月身世兩忘  
循始要終惟古是儔霜臺追典榮及九幽有爵松洞



衣履攸藏擣辭鏤石用垂無疆

繕工監假監役月灘吳公墓碣銘 并序

惟海西首陽之下錦山之東故有才學兼備而無命  
不需於時者日月灘吳公諱義善字惟日是也公幼  
穎悟七歲作八山詩有聞來知碧山漸入有人家之  
句時稱神才業公車老宿皆莫能爭衡既不得志於  
有司則曰人生自有事顧汨沒於此而已乎遂歛跡  
山樊力田養親暇日劬經不以外物自累遠近學者  
至者甚衆公隨才成就多以聞人稱鄉俗丕變至今  
彬彬有儒風年四十二遭母夫人喪其侍疾也衣不

辭帶將屬續血指灌口至居考憂時則公年已五十  
八矣猶執禮不懈人以爲難其治家甚嚴有法度條  
理井井不煩辭而事無不舉樛蒲棊博及術書小說  
之類不近其家由是子弟皆雅飭雖值世板蕩能好  
禮嗜義多行人之所不能行者識者又推公之賢以  
爲芝根醴源信不誣矣晚調匠即一啣卒于 當子  
庚寅距其生 純廟己丑為六十二歲矣初塋州之  
文化洞後移窆于錦山乾原吳氏海州望族九世祖  
允誠號西河與其兄林灘相公允謙同師牛溪成先  
生祖諱得秀 贈祭判以孝行旌閭考諱宗默以大

春湖曹公墓碣銘 贈貞夫人全州李氏考景采配  
杞溪俞氏考漢禹生 純廟丁亥卒 當寧庚子墓  
錦山雌鵲里西原生一男三女男鳳泳進士崔侑善  
李承鏹閔泳憶其婿也孫男璉根瓚根皆進士瓊根  
璉根子章煥瓚根子文煥銘曰  
於惟公世鉢傳坡門以孝以學績承厥源猗公之生  
胚胎前兆俊邁清爽稱于鄉邦勤儉成家能積能散  
隱淪沒身不知不愠一命匪榮施于孫子我銘豈諛  
百世可俟

春湖曹公墓碣銘 并序

春湖曹公年五十四而以今 上甲申四月干支卒  
于寢塋在宓寧之馬蠶山丑原卜吉尚有餘議十四  
年墓尚無刻塾其出后子也以其先友鄭艾山載圭  
氏狀問銘柁余余謂孝子慈孫顯其祖先宜在於繼  
述志事積累緒業以至光輝昭顯無幽不達此孝之  
至也何役役於外文之為哉再三辭不獲則乃按狀  
而叙之公諱益煥字謙受曾祖有成祖理源以孝行  
聞考敬殷妣金海許氏楮女其生以 純祖辛卯稟  
姿端雅慧悟絕人既長習功令業屢中鄉解不售事  
親以孝生養塋祭愛敬易戚並有可述與二兄友愛

深至連床大被湛樂怡怡嘗讀書在山房聞伯氏病劇而歸則已不省矣以未盡鬻鬚之誠為平生恨性喜施與凡親戚鄉黨婚娶喪葬飢病患難隨地賙恤曲有恩義金氏姊早寡曾以親家析箸時所得田土欲還之公辭終不受其篤於人倫重義輕財有如此自守甚嚴足迹一不及權要之門常悔汨於場屋不克從事問學日取近思錄性理大全等書諷詠誦念未嘗少懈教諸子必使先讀小學心體而力行之見其冠少偏則必令整之雖一家男女見其同席及授受相親則必厲聲責之自丙子以後蹄跡交橫時事

板蕩公隱痛在心悒悒不樂及讀洲齋宋山丈八條封事謂此疏之用與不用國家生民興廢休戚之所關也有一友人交頗密嘗論及已亥邦禮多逼尤翁公逐條辨詰不遺餘力近世前輩惟慕華西李先生每稱之以正人君子蓋其謹嚴於華夷人毀之際審察於好惡向背之分而不失所性雖古之君子當無以過矣臨絕無怛化意沐浴正衣怡然而逝尤見其存養之有定力也夫人星山李氏植範女生六男長均灝出為伯父後次均奕次塾出為仲父後次均玉次均升出為從父後次均華銘曰

人患不學學患無實猗歟我公南土之傑言顧行顧  
所性者仁孝友植本推己及人律彼馬蠶衣履攸藏  
我銘不刊用示無疆

勉菴先生文集卷之二十七

勉菴先生文集卷之二十八目錄

墓碣

伯祖考成均生貞府君墓碣銘

同中樞晚窗安公墓碣銘

察訪趙公墓碣銘

東場處士曹公墓碣銘

黃臯先生慎公墓碣後記

司憲府持平柳公墓碣銘

僉樞閔公墓碣銘

明川府使鄭公墓碣銘

學生鄭公墓碣銘

三溪文公墓碣銘

狎鷗軒朴公墓碣銘

牧使 贈吏曹叅議許公墓碣銘

孝子 贈司憲府監察林公墓碣銘

副護軍許公墓碣銘

老山慎公墓碣銘

昇平伯漁隱李公墓碣銘

兵曹叅判楸灘李公墓碣銘

孝子申公墓碣銘

遜溪文公墓碣銘

晚悟齋文公墓碣銘

都承旨南岡金公墓碣銘

載寧郡守文公墓碣銘

納新齋權公墓碣銘

贈童蒙教官竹村權公墓碣銘

司諫院獻納遜窩權公墓碣銘

贈司憲府大司憲愚谷尹公墓碣銘

南岡朴公墓碣銘

楸軒姜公墓碣銘

贈童蒙教官鄭公墓碣銘  
明谷趙公墓碣銘

勉菴先生文集卷之二十八目錄

勉菴先生文集卷之二十八

墓碣

伯祖考成均生員府君墓碣銘

并序

蓋嘗我 健陵咸際菁莪作育之化遠追三古上自  
公卿大夫下至草茅韋布彬彬多文學之士時則我  
伯祖考生員公與季弟素其齋公克念聯芳并美聞  
於國中雖為家運所否未克闡敷熙朝然尚古之士  
徃徃到于今稱之素其公之後至曾孫而不幸嗣絕  
獨生員公為嘉陰先生冢子故嗣屢絕而屢繼噫天  
之報施其不可知者若是乎今系生員公會孫名永

學者始生三男或者其在此乎公之歿在 純廟戊寅七月時嘉陰先生尚在堂作銘以誌其幽宅簡而實無一毫過語今在阡道之役尤何敢妄加溢辭謹按公諱克明字君翼號三島 英廟戊子生幼聰穎善記誦長業功令未弱冠聲譽藉甚屢占魁於泮試及都會間遊太學以各行見重凡有大議論大文字皆待公而定所與遊皆一代名勝癸亥行飲禮于泮中公實主之而衆推公爲相禮公孝友出天慈諒愷惻見之者莫不以溫然君子稱之家世簪纓中以寢微公奮然以樹立門戶爲己任又上逢堯舜之君利

器俟時朝暮大闕而取不過一上庠三中上第以微瑕還拔壽又僅止中身命矣夫公嘗築池宅前中象三島自號三島居士云有遺集若干藏于家我崔氏慶州人以新羅文昌侯孤雲先生諱致遠爲始祖若版圖判書致仕諱藹侍中和肅公諱玄祐顯于麗朝至諱通官溫水監務當麗亡守罔僕義 定宗太宗召不至歿 贈漢城判尹以褒之諱灌以直道粹燕山朝官止監司諱應虛光海朝以不參殺國舅廷請枳廢時遼瀋路梗當以水路朝 天人皆規避公由副价路陞刑判攝上使以行經萬死卒得城事

而還爭載尊周彙編丙子扈 駕南漢遇賊不屈被  
害寔六世以上也曾祖諱裕秦郡守 景廟辛壬以  
救護建 儲四大臣見罷今 上辛丑因大臣奏  
贈從二品 賜祭祖諱成默官副司正嘉陰先生諱  
光肇以學行為當時所推重妣坡平尹氏考府使守  
仁初塋嘉蔭里先塋甲原後移良坐元配青松沈氏  
宣傳官緯鎮女壯敏公楷玄孫也後配全州李氏考  
敬錫墓並附李氏育二女婿李宜昇李錫耆系子岳  
壽職僉樞公仲弟克敬長子也又無子我伯兄升鉉  
為後而承學即益鉉次兒也三男長勉植餘幼銘曰

健陵文明多士生國于類于野彬彬郁郁于時我祖  
績文蘊德出類拔萃名動京洛所仇者命郊島同惜  
蘆山之阿有封四尺嗚呼後之人其尚式

同中樞晚窩安公墓碣銘

并序

余有一步友曰學士安君弼獲是已君行已直方仕  
亂世稍稍露稜肩日持其先曾大父晚窩公狀授余  
曰吾祖生而行義著稱歿不蒙褒旌朝願借公一言  
以表瑩域是子孫之幸也余受而卒業曰有是狀芝  
醴根源吾柁君信其不誣矣遂按狀而叙之曰公諱  
義默字文若安氏順與人其先世大顯於麗氏晦軒



先生文成公諱裕寔為東方道學之祖配食于文廟  
自後屢公屢卿八本 朝有諱墩官大司成 天啓  
辛酉以水阨朝天丙子後力主尊攘義屢辭徵命不  
復仕曾祖諱性休進士 贈司僕正祖諱光進 贈  
吏曹叅議考諱梓 贈吏曹叅判妣 贈貞夫人楊  
根成氏載賢女諱世昌諱斗弼叅判之本生父若祖  
也公以 健陵丙辰生于陽智郡幼端凝嗜讀書性  
至孝志養無違親癢進指血有效居喪哀毀踰禮三  
年不脫經帶嘗求幽宅行不避夜恒有虎隨之異及  
塋廬墓終制服閱楮月再省墓不以雨雪廢里人競

除草掃雪曰此安孝子省墓路也值喪餘預先齋戒  
器皿饌品必躬檢致潔臨祭哀號無異袒括嘗出遠  
還赴親忌適大雨川漲不得渡公痛不與祭臨川號  
泣遂揭衣下水若有神物扶持不覺已到彼岸兩邊  
阻涉者莫不驚歎以為至誠所感也有弟歿而嗣絕  
恒懷不洎之悲與人交不設畦畛腆腆如也平居以  
敬一字為佩身之符朝夕誦敬齋箴以自警除讀書  
應事外必危坐整檢嚴立家法明正倫理教子御僕  
皆有法度今 上甲子中生員特授通政僉知中樞  
府事癸酉除敦寧府都正甲戌陞嘉善為同知辛巳

六月自知衰瘵命呼子孫書孝友勤儉四字以遺之  
曰謹守此四字俾無替家業遂以是月二十九日卒  
壽八十六葬于水原南谷面墻內洞庚坐原與公配  
贈貞夫人晉州姜氏合封夫人考在榮生乙卯先公  
四十一年辛丑卒孝順有婦德有三男六女男正煥  
都事玘煥翊煥皆郡守洪善慶黃泰顯尹滋善郡守  
李承益李咸信閔泳島其婿也正煥二男一女致元  
文科正字早卒致和女適俞鎮洪玘煥一男一女奎  
聖主事女適朴魯寬翊煥三男一女男幼女適鄭淳  
衡洪善慶黃泰顯並無育尹滋善一男相輔女適申

咸熙李承益二男李咸信二女皆幼閔無育致元一  
男二女男即弼漢文科今秘書丞女適俞炳益宋秉  
倫致和二男肯獲進士光獲主事奎聖一男幼曾玄  
不可盡記銘曰

行本於孝德本於敬既孝既敬以全其性四訓炳炳  
貽厥維則百世之後視此貞石

察訪趙公墓碣銘

并序

余從湖南人士遊聞王川趙公智崙相好亭事孰矣  
日其後孫昌駿以公遺事一通遣門秀士寅錫學泐  
請爲墓道之文噫兄弟爲讐食君之祿而令父母愁

自韓文公已不能無歎息况今世乎如公篤於天倫  
正宜大書特書以警頹俗遂不辭而為之叙謹按趙  
氏以高麗大將軍璋為遠祖高祖諱佺封玉川府院  
君曾祖諱元吉恭愍朝以定策勳至封君見麗運告  
訖退居淳昌古里杜門自靖自號農隱以見志卒謚  
忠獻士林俎豆祖諱瑜號虔谷官典農寺副正時喪  
制廢弛類百日即吉公獨喪三年如禮我朝屢徵  
不起避居順天英陵朝旌其閭曰孝子前副正益  
並褒其忠也享謙川祠副正二子長斯文左軍司正  
贈吏曹叅議次崇文兵使梅竹成公三問姑夫丙子

與其子 贈教官拆山同殉在六臣之禍謚節愍享  
莊陵壇公叅議出青松鄭氏叅軍尚周其外祖也公  
幼而岐嶷長能好學由四子五經至百家子集皆涉  
獵通貫如誦已言梅竹公稱之曰此人可大受以薦  
除寢即遷為叅禮察訪勸農鍊卒攻駒繕廨驛屬逋  
租董率曉諭趁皆輸納及遞郵民頌德立石記之公  
志尚高古於權門要路未嘗為趨起足嘗言人在斯  
世所惡者心不若人班資崇卑不足較也乃歛退榮  
塗潛心古道事親極志物之養兄弟篤因心之愛時  
伯氏僉樞仲氏縣監季氏叅判俱無故母夫人年近

八莖尚無恙融融怡怡舉室在和氣中人皆艷稱及  
壻歛殯塋祭易戚備至朔望必展墓不以風雨或廢  
就府北謙川之上結一小亭扁以相好四昆季晨夕  
與同寢興於斯講論於斯觴詠於斯不知世間榮辱  
得喪之爲何事只以教子孫引後進爲第一義常謂  
父兄不教是棄其子弟子弟不勤是自棄其身輒嚴  
立課程使羣子姪每日受一般子書數板史記熟讀  
詳誦又勉之以思索體驗日用服食務從節儉蓋其  
稟質之美存養之深不可誣也乃以 弘治癸亥四  
月干支考終于寢距生 正統丙辰壽六十八今順

天雙巖面書堂洞負良原卽其藏夫人晉州河氏考  
剛荏公漢卒後公六年墓同塋一男穩娶永膺大君  
敬孝公琰女官尚瑞院直長早卒孫男察訪淑珪承  
義副尉淑琦忠順衛淑璟將仕郎淑城縣監淑瓘女  
校理宋世琳曾孫男大楠秉節校尉以行義聞大春  
出爲淑璟後蔭校尉與金河西白玉峯爲友主簿金  
景貞察訪張俊妻淑琦出大成與李一齋并德 贈  
佐卽忠成出爲淑城後文成安成參判金健參議李  
希天生員金震秋妻淑瓘出餘不盡述噫公家文獻  
重經兵燹筮仕年紀制行首尾雖不可詳上下數百

年孝友也敦睦也文行也佳子賢孫世趾厥美蔚然  
為南土法家又其賢士大夫所揄揚稱述不啻丁寧  
則公之可傳蓋不待言語文字而有餘地矣易曰積  
善之家必有余慶其信矣乎銘曰

誦詩三百用或不達公實咀嚼非備耳目一語妙契  
發乎心得由是以推澤及庶物亦粵家世忠孝閱  
芝根醴派厥理孔晰相好遺風百世矜式

東塲處士曹公墓碣銘

并序

嗚呼此長城府北二十里錦谷之源負友而封者近  
故東塲處士曹公諱毅坤藏也公生於 仁陵壬辰

以今 上癸巳卒于高敞居第之正寢門人知舊加  
麻致祭者數十人粵十三年乙巳嗣胤錫休具書與  
幣諺託以刻阡之文余於公雖不及顏臭味所同願  
一識荆者久矣不容以老耄辭謹按公字士弘系出  
昌寧鼻祖諱繼龍尚新羅真平王公主封昌城因籍  
焉歷羅迄麗世有顯人至諱庶事我 太祖 太宗  
承 命書進洪範朝 天蠲貢官寶文直提學號清  
澗三世部將諱琛遜于牟陽五傳至同樞諱彥徵號  
三吾堂以孝友著於公五世高祖諱守亮階通德曾  
祖諱永華祖諱啓聖考諱炫璋並文行克家妣竹山

安氏光映女有婦德公天姿秀異象中遊嬉長老相  
謂曰羣兒石也石也至也石公小字幼有至性在親  
側怡愉洞屬朝夕必躬執薪饌冬日輒以身溫被十  
四五文識驟進治功令有聲既冠贊謁蘆沙奇先生  
于沙上衣冠鞍馬頗侈及見先生衣僅菽體凝塵滿  
室乃歛然自失曰用心於內故如此自是華麗之物  
不復近身執弟子禮甚勤進退周旋一如事親講道  
問業晨夕孜孜多聞諸子所未聞先生誨人談古及  
省書會心語句逐一劄記積成卷帙其辨析義理真  
實刻厲之首尾始終皆載於此始從事於一心內外

賓主之訓究其要而反諸身翕然不違先生嘗稱于  
萬人中常知有已吾見士弘又曰士弘孝於親故事  
我如此親瘠憂形於色行不能正履藥餌煎粥廁踰  
澣濯必躬親之或至四五朔不交睫丁憂哀毀幾絕  
水漿不入口三年不脫經帶不御酒肉嘗與諸友宿  
于峽店食有魚矣而蔬菜在公衆奇其事問其故答  
曰見其瘠察知其不肉矣服闋望朔必上塚忌祭悲  
號哽咽涕淚沾襟與祭者莫不盡哀與庶弟二人克  
盡友道推以至於族戚鄉黨內外婢僕恩義備洽踈  
遠輸款暴慢致恭峽俗化之男女異路喪不用浮屠

駸駸然淳古之風矣已卯冬侍先生于澹對軒夜聞  
先生起歌夢詞公曰先生殆將病矣趨而入先生曰  
疇昔之夜夢得歌謠此吾命詞足成一闕子其識之  
公出而悲痛曰哲人其將萎矣未幾先生易簣加麻  
心喪一如黃勉齋服朱先生故事治任而歸卜筮東  
岡不取聞達箎瓢自樂後生學者欲聞先生之道者  
求之於公塾舍不能容雖在草野不忘憂國所著止  
盜論槩見其施措嘗邪徒大熾公以扶正為已任言  
議所及皆潔淨自守而所居一坊獨超然於風埃鄉  
人每以公應刻薦致書尼之邑宰聞公名相邀引疾

不見所從遊皆同門宿德同志友生相與諷詠於山  
深林密之間風清月白之辰不知老之將至世間芬  
華一無所入於其心平居竟日端拱未嘗見敬側待  
朝疾書亦不怠效契見人好學親愛之無已聞人善  
行取之若不及者書不務涉獵而必取為實得為文  
不尚華藻而僅足於辭達嘗曰人於出處失其義則  
雖有細行不足論也士於毀譽動其心則雖有操守  
不能堅也又曰立言牖世先師之責吾輩當脩立身  
心庶幾不負帝衷又曰雖公天下之言其設心近名  
則不知其為全好人公所守如此故不喜著述或出

於舒志達情者門人竊錄之輒止之曰是有之無補  
無亦何闕蓋其天姿近道而培灌種植滋於曩倫故  
自父兄師友之間以至動靜言為之際發見真切者  
類如此古語稱躬行君子者豈不信然矣乎至其臨  
命無怛化意眷眷以孝悌忠恕勉其後來者尤以見  
存養完固死後乃已之意也配光山金氏考文珣後  
公一年歿一男錫休一女適高興柳允錫錫休有二  
男六女男曰惠承次旭承女適河東鄭淳榮咸平魯  
漢塾奉仁許煬次幼次男次三女側生噫士生斯世  
其不為俗學所牽而有志向上者鮮矣有志矣其得

如先生者為之依歸又千載一遇而身後狀德又出  
於先生肖孫則公之行治可保其傳之久遠而無惑  
也是可以銘銘曰

瞻彼牟陽山盡水迤迤鍾其靈生此髦士樂易慈祥  
夫厚厥植謹其依歸蘆翁是則庶幾夙夜以踏實地  
充美輝大不敢妄擬吾信之間胡不相視嗟公受授  
百世可竦公自能以何事于碣惟其如是我銘斯揭

黃臯先生慎公墓碣後記

先生師友淵源學問造詣自有原集梅山龍田二公  
所述狀碣詳且盡矣竊觀事實中合有補入者戊申



逆變因按覈使詢問力言脅從罔治之義而使嶺湖  
間數千人命賴以全活一也孝進升聞 特恩賜米  
而陳情不受還納縣官二也心專屬氣湖洛鐵案而  
篤信張子心統性情程子心也性也天也一理之訓  
深明其不可遺理而言心三也此皆碣文中所未及  
故因追錄如右始葬黃山洞北麓甲坐後以宅兆不  
利移窆于迎勝村負壬原曹夫人祔下後之人尚有  
以考焉

司憲府持平柳公墓碣銘

并序

不佞早年隨經生居成均館西齋與柳公廷植善公

精句讀善文義儕類無能出其右 當宁戊辰應請

春塘臺別殿 上閱其老而屢屈也因付殿試由起

居注歷成均典籍春曹即尋遭內艱毀瘠幾傷生甲  
戌除司諫院正言丁丑丁外憂居廬盡制服闋為成

均直講遷全羅都事入為吏曹即甲申十月逆酋輩

劫遷 乘輿公率曹隸隨宰臣沈相薰有護衛功乙

酉出為成歡道察訪例管稷山平澤等數邑居官清

白吏憚民懷至繡衣啓 聞丙戌內遷司憲府持平

至兵曹即此其數十年履歷也乃以己丑十一月八

日考終于寢距生 純廟壬午壽六十八塋南原柯

亭里左麓乙原公性根忠孝進而供仕則夙夜服勤  
罔或少懈退而省親則身親鄙事養極志物兄弟怡  
怡三樂居一公詩所云親老家貧遠養志旅遊每切  
陪兄夢者可見公孝友之根於性也公字義卿號千  
溪文化人柳氏自麗朝大丞車達始奕世簪纓佐命  
功臣忠景公亮漢城判尹京生十世若十一世考泐  
以侍從 恩加通政至嘉善同中樞追 贈祖鎮房  
戶曹叅判曾祖墳左承旨高祖之煥司僕寺正妣貞  
夫人慶州金氏希燦女齊淑人順興安氏考璫有婦  
德公族邸數十年無內顧憂者夫人之助焉多云墓

各祔一男煥詰一女適李東浩煥詰娶慶州金益河  
女生三女適宋洛奎梁璟烈晉炳宇次娶慶州金炳  
義女生一男三女適金教俊朴海哲餘皆幼煥詰白  
首踏繭請銘于不佞撫念疇昔自不禁幟洋之懷也  
遂爲之銘曰

文簡文正顯自麗室忠景判尹世傳名碩平陂百年  
能食舊德公乃崛起殿庭魏擢卽曹臺職平步履歷  
蓋公平生敦本務實柯亭之麓有封四尺我作銘辭  
垂示千億

僉樞閔公墓碣銘 并序

愈知中樞府事閔公年九十一以 當子丁丑六月  
干支考終于山陰釜谷里第鄉井士大夫咸咨嗟太  
息曰善人也信人也今日何處得來謹按公諱奇洙  
字子裕閔氏籍驪興譜自高麗尚衣奉御稱道始奕  
世圭組傳至禮儀判書安富見麗祚告訖避于山陰  
子孫因居焉 國初有同福縣監綬號雪川除官不  
就傳數世 贈左承旨遇司僕主簿世尹俱以學行  
著是五世以上曾祖諱胃鉉祖諱宗魯考諱道煥外  
祖丹陽禹弘規以 建陵丁未八月生公家素窶難  
以爲養採山漁水凡干糶屑率皆躬執嘗設網前江

魚輒滿畧值歲大歉買米百里外得贏餘濟家衆以  
爲常膏柎中階值日暮前有峻嶺猝有羣盜數十見  
而欲劫之公爲言其故辭甚愿款有一賊聲言曰子  
非某地居某人耶吾輩雖賊聞公誠孝久曷敢害諸  
因護送十許里邑倅聞公行義數存問公不得已一  
往謝時 朝家有令減白骨之役公因其問而陳所  
居里弊甚悉倅聞之慨然劃減冤徵十戶及還有小  
民數輩以酒肉要於路左曰俺等再造何敢忘也禹  
夫人年九十七而卒公亦七十餘居廬盡制罔或少  
懈設洞約以勸民俗略如藍田條例見讀書者輒欽

愛之又勸導之務欲成就蓋恨其少貧失學也平生  
臥不側身坐必竦肩外物芬華視之若浼以優老典  
加通政每早具冠帶向北四拜祝 聖壽人有自京  
來者必問國家安否洋賊陷沁都輒奮起視勇曰如  
有同志我當舉義勤王蓋其忠孝之性正直之氣根  
於中而著於外者如此淑夫人順興安氏相慶女先  
卒男百鎮女李燦國孫男丙燦進士禎燦女鄭某都  
炳夏鄭友民田鳳熙柳尚燦宋雲翼進士丙燦男致  
教致均女崔相秉宋麟然餘幼禎燦以狀丐銘不容  
以病廢辭遂叙其世系于孫係之以銘銘曰

夫子言文質彬彬然後謂之君子以野與史皆有失  
也至欲用之則曰吾從先進又惡其以文滅質也猗  
歟我公古人之風雖有謙於彬彬優其質而可從彼  
夸毗而咕囁兮庶觀感而動容諒考實而匪誣兮微  
斯人誰與同

明川府使鄭公墓碣銘 并序

嶺之三嘉有處士鄭載圭厚允故叅判蘆沙先生奇  
公高第翁子也狀其十世祖府使公行具書與幣請  
銘于不佞噫世教衰人心陷溺莫今日若士大夫為  
名而遺親後君者相環也甚至如忍犯弑逆之賊接

迹橫行覲默無耻溢目禍亂何所底止伊欲倍百強  
艱汲汲如鼓幣以救蝕則如公事實尤宜到底表章  
又何待孝子慈孫之有請竊不自遜冒拙按狀而謹  
書曰公諱震哲字元叔鄭氏其先自高麗侍中光儒  
侯倍傑始是生政堂文學貞簡公文請立箕子祠以  
明仁賢之化父子相繼贊揚文教自是世襲忠孝為  
東方顯閥不須譜也傳至西亭公諱王潤與弟孝貞  
公王良移居三嘉嘉之有鄭始此曰來彥縣令與趙  
漁溪旅金畢齋宗直相友善曾大父曰霖大父曰之  
鳳考曰明三世並參奉外祖光州全就鎔壬辰四月

倭寇猝入人皆雉鳥散公與同開朴公燁妹婚曹公  
繼明募村丁先倡入縣鄉里同志朴思齋尹彥禮尹  
鐸尹銑鄭陞盧錚許子大諸公相繼而至會淨襟堂  
議討賊方畧時郭公再佑起宜寧陣岐江朴公以下  
皆赴其陣惟公及曹朴二公留陣本縣每臨戰以死  
自許賊不敢近時稱三將軍等岳堅山城為戰守之  
計已而賊自居昌踰葛嶺屯古縣登也伺峴峴之乃  
嚴勅部伍相持累日夜於岷嶠山上對山城穿巖孔  
繫繩駕空通道衣木偶以絳衣緣繩往來乘月翱翔  
若飛將然賊望見大駭曰聞江右有天降紅衣將軍

今在此引軍逃遁蓋郭公有天降紅衣之號而公借以瞞賊其設機制勝以少敵衆之妙類如此丁酉賊再舉東搶本縣以兩營要衝無人守禦公與朴公慨然奮起通諭列郡首尾數百言字字衷赤江右士民扼腕相謂曰忠信者再起吾等有屬矣於是修築岳堅乘便應賊時火旺則郭公遣喪解陣黃石則趙公宗道城陷殉節惟茲孤城爲虜夫之的賊藐我勢孤圍之益急始等城也懸石等之夜深斷繩萬石齊下噴薄震蕩聲動天地賊驚惶奔潰死者亦衆自是江右諸郡賴而保存三公之功居多焉公以 隆慶戊

辰生至 萬曆壬辰年二十四亂定朝廷錄其功除直長丙午登勸武別科直除濟物梁萬戶例差內禁衛陞司猛司勇行明川府使光海甲寅退歸不復仕沉晦以終治東大谷里卯麓即其藏淑夫人田氏同塋焉惜乎世傳文獻重經籍微幾乎無徵唯倡義事實散出於各家文字可按而徵也蓋臨亂奮義綽有樹立豈不偉哉而惟相時而退不亂於羣肝亦難矣有五男曰弘毅都事弘訥副司果爲伯父震善後弘恕弘憲弘允 贈佐郎弘毅男泰卿澤卿而檜側出弘訥男觀卿弘恕男升卿熙卿弘憲男樟樞後卿女

李仁林李世華弘允男模宣傳彬階通政桓櫓楷楷  
効力副尉曾玄以下不盡錄銘曰  
草野願忠等是心赤既疎且逃誰識面目百里少試  
莫我損益曰有所志我泉我石魚鼈鮮腴藥穎豐茁  
沒齒無怨如歲寒柏

學生鄭公墓碣銘

并序

草溪鄭公覺民字致良孝友樂善斷斷有古人風  
鄰族戚賴而憐憫不幸年五十一以今 上辛巳卒  
于家塋三墓洞負庚之原嗣胤邦桂懼懿行之泯沒  
也將豎表於前遣其子昌圭袖其族姪載圭狀乞銘

於余謹按鄭氏其先自高麗光儒侯諱倍傑始考諱  
東珥祖諱師一曾祖諱道俊 贈吏曹叅判西亭公  
諱王潤其中世顯祖也妣咸安趙氏其考滄公蚤孤  
趙夫人嘗置膝釀滫曰孰能教汝而爲人也公輒戚  
然日用事爲承順其志罔或少懈母嘗患瘡公乃乘  
夜往草殯累累處取朽木依俗方試之得效已知其  
孝思出天也及長幹蠱勤耕稼節衣食應對宗族役  
使僮僕各有條理先是族黨一人管外事出納錢穀  
至是較檢文券有百許緡當推公不復問及其券成  
就一第克持門戶一日不相見輒躬往問其由賓客

過從無不迎接戶屢常滿而待之一以誠信於賢有  
德者倍加尊慕族親如懼而軒彥民鄉里如崔夢關  
惟允殆心悅誠服不苟同世俗而為低仰歲丙子大  
侵青黃棲畝人已離散公召服親貧乏者及奴僕艱  
食者計口救急人皆飲德公遭內艱致哀謹禮初終  
時所著夏服至冬不易既虞變食乃著綿見者以為  
難配星山李氏佑華女後公八年沒墓各附一男五  
女男即邦桂趙昇奎李敏九全永祐成煥瑾鄭濟和  
婿也孫男即昌圭外孫趙某某李某某銘曰  
工詞章者未必得好惡之正朱輪轂者鮮聞有睦婣

之風善信其質公能始終

三溪文公墓碣銘 并序

士有讀古人之書享耄期之壽而問及日用道理則  
便茫然不能置對者十居八九故三溪處士文公終  
老林樊雖不槩見夷攷其遺訓大槩則謂道之大原  
不外於孝悌忠信而以立志為先小學一篇為進修  
根基云者雖前輩復起無以易斯言矣公諱世楨字  
國老文氏籍南平譜自新羅大阿瓊多首始鄉相勲  
業世不絕書麗朝江城君三憂堂公諱益漸為尤著  
傳至 靖陵叅奉士元與靜菴趙先生為中表兄弟



是生昌後柳眉巖薦在朝除宗簿寺直長是生弘系  
掌樂院僉正是生仁克丙子舉義其五世以下考諱  
德望妣長興魏氏之望靈山辛氏其本生也公稟性  
溫靜聰明絕人年未成童詩禮春秋類能通曉事親  
生養墓祭極其禮制兄弟盡友愛鄉里嘉其行將薦  
聞營邑則即奪其狀而固辭曰是重吾不孝也所居  
白巖上七里鍾伽山下三溪之間泉石鮮潔雲林窈  
窕公顧而樂之結廬求志若將終身其詩曰簾外山  
光淨屏前水氣涼纖纖菊露濕曳曳茶烟香此夜情  
何極悠然興轉長無人問所樂隨月憑胡床其寓志

清高不為外物惹絆者如此享年七十一以長陵  
戊子卒于寢墓在綾州治北虎陰谷坐丙之原夫人  
星州李氏元衡女溫柔貞淑克盡婦道後公五年卒  
墓各祔一子貫吾七世孫載恒收拾遺事丐余置一  
言遂依狀叙次銘曰

事親從兄仁義之實氣拍欲牽鮮保厥德公能以之  
月朝靡忒升沉百年遺芬不沫孝孫克家闡明是篤  
有封四尺過者其式

狎鷗軒朴公墓碣銘

并序

士而不得進為於時則退藏私淑講服古道雖隱顯

微著之不同其所以維持國勢奠安民心爲公私相  
須緩急可施之地則一也狎鷗軒朴公林癸五十年  
無赫赫名有翼翼心平日進修不越乎敦本務實詩  
書藝文門內又有如遜齋安村黔巖諸公或以儒學  
或以文章名節磊落相望一是祖述乎宋文正先生  
之道義事功而無他歧之惑則其觀法效則又不待  
朮諸外人魯無君子斯焉取斯者尤可信也公諱光  
夔字舜臣順天朴氏胄高麗左丞英規八我 朝文  
肅公錫命佐 恭定王爲一時名臣是公十世八世  
祖叔善官叅判爲姪子元宗叅靖國元勳門戶威滿

避地錦城子孫散居遂爲湖南望族曾祖聖民副司  
勇始居朮禮藍田祖纘善考尚履妣義城李氏生五  
男公其季也公二歲而孤以不記父面不及持服爲  
終身慟奉備慈極其誠敬採拾爲養甘旨畢給謂立  
身顯親亦我分內黽勉場屋發解者三不售有司乃  
歎曰得失有命此豈以人力爲哉輒專意耕讀不復  
應舉母疾革血指延五日及喪廬墓盡制以親病適  
值時食青魚而未及供進終身不口此雖一事亦可  
見終身之孝也所居藍溪在頭流之下泉石鮮潔草  
木叢茂講習餘暇輒乘輿盤桓悠然有出塵之想遂

以英宗辛巳考終于寢距生 肅宗戊子享年五十六葬藍田坐坤之原夫人扶安金氏柎子男四人長重拭過房重秀重仁重林皆明秀志學士林推重孫喆鎮一鎮桂鎮重拭出昇鎮重秀出鍾鎮聲鎮重仁出寬鎮重林出以下不盡錄玄孫暢鉉以黃上舍珖所述狀並銘於余余受而反復其人不可見而其心若可見遂叙以銘之銘曰

維順天氏世振厥聲公襲前光自待不輕藍田幽居歲寒松菊碩人不諉考槃在陸遺芬未替後人之式

牧使

贈吏曹叅議許公墓碣銘

并序

尚論百年之遠不規規乎疑信文獻而攷證於出處交際之間則其人始終大致庶可想像而不遂為全庶無據吾於雲溪許公亦云謹按公諱守謙字而玉許氏系出駕洛上祖諱琰高麗三重大匡封駕洛君四傳而有諱有全銓曹侍郎又四傳而諱錙我世宗朝直學士於公六世高祖諱裨僉知中樞曾祖諱伯珣宣務郎祖諱頤桂考諱億富號素菴受業崔新齋門文章行義為世推重當時名德若成聽松李訥齋奇服齋朴認齋全甕泉諸公為道義交已卯禰後遂隱不仕訓迪後進為已任妣忠州池氏錫龍其考

以明廟戊午三月干支生公于光陽釜嶺村第公  
生而天姿豪邁才器卓絕以聰穎資襲家庭訓爲世  
巨儒萬曆戊子登第柳西垌根李五峯好閔李石  
樓慶全鄭愚伏經世皆一時交契也壬辰島夷之亂  
以承文正字扈駕至義州及還拜兵曹正卽移戶  
曹由銀臺出宰康津萬曆乙巳以靖難功一等  
賜勲券尹梧陰李白沙諸公皆同盟也出爲公州牧  
使秩旣滿等室飛鳳山下遂絕意宦途婆娑丘林不  
知老之將至沉潛性理教導後生爲至樂所居有釣  
磯嘯臺竹塢梅逕軒曰巖樓樓曰洗心噫強而仕老

而退恒物之大情而士君子所同也或者怵迫勢利  
睽睽軒冕印紱之間老而不能退或退矣而酣豢餘  
習厭苦淡泊顧慕疇昔不能忘情者多矣公蚤占桂  
籍薄試內外終焉歛退就儒結情於水竹烟霞之間  
而浩然自得若將終身者跡其心豈入而不知出往  
而不知返者所可彷彿其藩籬哉只茲一舉可以槩  
公矣公以仁廟甲子九月十日卒朝廷嘉其功  
贈吏曹叅議墓在釜嶺青龍良坐夫人咸陽朴氏載  
恒女有內助墓合封一子綱官訓練判官判官二子  
彥聖慷慨磊落自放山水以終彥哲二女適朱慶廉

宋文佛曾玄不盡述後孫炯以奇寢郎字萬野為狀  
來請銘不容以老病辭銘曰

於赫許氏著自麗室侍即直學垂炳史牒亦粵素翁  
尚志林壑誰其師友一代鴻碩公述志事發揮孔晰  
難進之義易退之節最公終始莫此為先我闡厥懿  
以詔永年

孝子

贈司憲府監察林公墓碣銘并序

嗚呼此南原府蛟龍山金岡洞負壬四尺而封者故  
孝子 贈司憲府監察林公魯賢字聖七衣履之藏  
也蓋聞公年才十二失怙哀毀如成人母夫人或有

不豫色輒號泣日子不能悅親心罪孰大焉肉袒請  
糲期致和悅家雖貧遇時食鮮腴不計且高下必極  
力供進口不貳價市人感服值疾病嘗糞禱屐如古  
孝子為者時母夫人年九十餘而公亦六旬矣篤於  
友于析箸什物皆厚於彼而薄於己教子孫有法度  
勤儉節縮恒推其剩餘贖宗族鄉黨貧乏者以今  
上丙戌終距生 紀廟甲申壽六十三己丑因多士  
上言 贈職旋閭噫人得天地生物之心而為心者  
曰仁仁主於愛愛莫切於愛親實衆善之原百行之  
本君子所以存之者此也衆人所以去之者此也跡

公始終優為存之之君子也吁亦賢矣林氏系出  
平澤以高麗領三司禧為鼻祖傳至觀海檜官牧使  
甲子适亂殉節是生得悅文獻納有丙子義蹟於公  
為九世曾祖洛基祖永鍊父相奎妣順興安氏諱相  
文金海金氏其本生父母也配利川徐氏考敬達一  
男岐周居昌慎氏考宗崙三男顯周秉周淵周銘曰  
莫曰無施種德丹田莫曰不顯聽卑其天唯茲鮮原  
衣履攸託刻示貞石警彼樵牧

副護軍許公墓碣銘

并序

公諱結字解卿許氏系出陽川其先自麗朝巡檢使

徵始入我朝孝莊公惟禮討施愛亂勲封吉城君  
贈工曹判書其十二世曾祖諱斗燦祖諱淑考諱桂  
妣延州玄氏相默女公以純祖丙戌登道科第一  
人由成均館典籍歷兵禮兩曹佐郎司憲府持平掌  
令司諫院正言校書館判校章陵令咸鏡都事全  
郊察訪陞通政階為副護軍此其內外履歷哲宗  
丙辰病卒于寢距其生正宗丙午壽七十八葬在  
雄城西流渭社寺洞枕坤之原公狀貌魁偉記性絕  
人自少喜讀書誦念玩索到老采勤天性孝友庭無  
間言見人善若不及聞人過若已疾徭祖墓無嗣者

置田祭之遠族人孤窮者極力贖恤其制行如此齊  
淑夫人金海金氏考聲澄生一男鉀早卒二女朴富  
允崔昌律晉州姜氏考進士鳳周生二男龜駿一女  
姜鎮源龜師事姜雅山進奎飭躬劬經鄉黨矜式去  
乙未剃髮隻手聲音有衛正斥邪之功噫觀表而知  
治見青而識藍法家淵源尤不可誣也爲其墓尚無  
刻也遣姪子璨南走千六百餘里謀及於不佞事雖  
左而志甚勤不容以老病辭銘曰

許氏之先著自勝國巡檢避地義重罔僕吉城魏勳  
亦曰討賊天厚厥報世食舊德公乃挺生文譜登籍

柏府薇垣卽署郵督平步內外馴致緋玉乃其制行  
孝友嫻睦闡善掩惡所性明直在家在邦庶幾無斁  
根深末茂其理孔哲有子克家昏衢一燭引而伸之  
仔見陽復有蔚佳城寺洞之麓刻詞于阡垂示于百

老山慎公墓碣銘 并序

余夙聞安義三洞雲林邃密溪石鮮潔上下百年意  
必有碩人逸士盤旋邁軸於其間徘徊夢想庶幾朝  
暮遇乃者得老山慎公於紙上文字槩知爲隱淪樂  
志之君子也就加反復則竊見其始終行治倫理上  
做工夫學問邊用精力講究踐履到老彌篤孝友忠

信不由勉强可謂不售之蘊玉而非世俗纔有一能  
寸長急急或銜者所可同年語也二子七孫皆敦本  
實業文辭趾美承家又有早揚 王庭出入侍從者  
是又非公連世不食之報耶吾聞黃流不注於瓦缶  
福澤不降於滌人是則老山公之賢可知已公諱道  
明字擴初上祖修以宋朝進士來仕高麗官左僕射  
謚恭獻 國初有戶曹判書仁道判書生襄烈公以  
衷襄烈生叅判幾四傳至樂水齋權享龜淵書院諱  
復亨諱謫並叅奉是高祖以上曰景昇曰杓曰守儉  
曾祖祖彌妣密城下氏生父守彞師事寒泉李文正

文章德行冠絕士流世稱黃臯先生公生以 肅宗  
癸巳年八十二而卒於 正宗甲寅塋于望月菴後  
亥原齊延安李氏昶女有女士行男長性天次性中  
性天男必觀必履必復執義必昂必昇性中男必煥  
必燬必觀無子以必昇子在弼為系必復男在文在  
式在聖女金錫孝進士魚用徹金厚相必昂男在弼  
過房女鄭海有必昇男在經在鉞女下致允必煥男  
在魯必燬男在察請銘者宗鎬宗燠玄孫也銘曰  
聖門設教蓋亦多術餘力學文兩端是竭世衰道微  
而鮮其能公乃實踐始終淵冰在今則無古或可徵



瞻茲玄麓有封四尺式闡厥幽警彼樵牧

昇平伯漁隱李公墓碣銘

并序

前朝寶文閣直提學昇平伯李公塋在居昌知五洞  
成原後孫等相與言曰吾先祖名節德業誰之不如  
顧今數百年尚闕顯刻靈若有知其肯曰余有後乎  
將立石以賁墓道使門秀士秦煥斗煥問銘於不佞  
考世尚論不敢以病廢辭謹按公初諱敢後改以致  
字可一籍陝川考諱安熙典法判書祖諱元慶直提  
學會祖諱光斌禮儀判書尚書左僕射新羅開國功  
臣諱平其鼻祖也妣坡平尹氏判三司瑾女性度温

雅多識前言徃行以至正辛丑舉公于陝川里第幼  
而岐嶷坡平君靖厚公見而異之曰此兒後必為鳴  
世君子庚戌丁外憂時喪制廢弛士大夫居喪類百  
日即吉公廬墓盡哀獨行三年奉偏慈養極志物丙  
辰徃拜圃隱鄭先生于彥陽貶所質疑問難卓越流  
輩先生大加稱詡戊午丁內憂執喪一如前 洪武  
乙丑登文科歷執義舍人等職時偽主荒淫公謹直  
敢言有古爭臣風為一時搢紳所推重庚午冬恭讓  
即位錄推戴勲拜公寶文閣直提學昇平伯我 朝  
受命與杜門諸公掛朝天冠戴蔽陽笠登不朝峴喟

然一慟謂吾以世祿之臣生不能報國死不免爲臣  
國大夫何面目見先人於地下乎其詩曰生爲王氏  
臣死爲王氏鬼又曰柳深元亮宅薇吐伯夷山不渝  
平生志世守籛三韓遂決意南還家于郡北萬代山  
西松如峴杜岳澗蓋取松京萬壽山西杜門洞之義  
也命子孫勿治科葉漁釣鼓琴以終其身噫麗運告  
訖天命去矣民心離矣 聖人作萬物覩一時知能  
之士爭欲乘風雲之際依日月之光以求尺寸之功  
者項背相望其能以舊國爲念而辦不屈之志守歲  
寒之節始終磊落曠然不滓者抑又幾人若公者其

可書也已狀是國初宰臣權探賄述而其外文獻屢  
經鬱收嘉言懿行十不傳一重可慨也銘曰

聖祖龍興望叶神人武定文昭其命維新曰有志士  
義不臣僕同我狗馬遜于南服元亮高操西山清風  
跡公終始非私伊公睠彼鮮原衣履攸託我銘厥由  
昭示千億

兵曹叅判林灘李公墓碣銘 并序

吾東威族李氏爲最而 國朝五百年名卿顯士譜  
不絕書者唯全州氏是已昔在 成廟之世則有若  
騎曹侍郎諱瓊全字玉如號楸灘公其一也高祖政

堂文學文挺號黃岡疏論崇佛廢學短喪之非為麗  
朝名臣曾祖檢校中樞副使蒙祖河東監務 贈吏  
曹參議仲由考判官 贈吏曹參判達誠縣監慶州  
李種彌其外祖也公以 正統戊午生 天順壬午  
擢文科選湖堂歷弘文館副修撰 成化庚寅擢重  
試移拜應教兼 經筵侍講官乙未又擢重重試陞  
嘉善拜兵曹參判兼同知義禁府事又拜司憲府大  
司憲晚年休退于全州之楸川漁釣觴詠為終老計  
竟以 弘治甲寅二月二十二日卒享年僅五十七  
成廟親製輓詩以悼之噫 聖主眷念之篤豈無所

以而然哉公才藝出類加以博學文章鳴世兼之  
以篤行一自就傳華聞大播逮至釋褐慨然有澄清  
之志并載 經幄啓沃甚多終乃辭却簪纓優遊於  
江湖之上而無怨悔之意則公之賢可知也已公歿  
後五年戊午史獄起而公之族孫貞簡公穆與一代  
善類同被酷禍則公之早自勇退亦豈非見幾之明  
也歟惜乎世代寢遠嘉言善行不得盡傳而惟誠夫  
人箴一篇足見其忠孝丹心眷眷不渝此可為全鼎  
之一齋也塋于府西伊城洞甲坐從享于黃岡祠配  
貞夫人商山金氏持平利用女墓與公同原一男綱

義盈庫奉事一女尹世欽判書孫男羽叅奉曾玄以  
下不盡記今其雲仍正錫等將伐石以資隧道請文  
於不佞顧此老朽累辭非其任而厥懇愈篤遂按狀  
而叙之系以銘銘曰

黃岡肖孫 宣陵賢臣言行無疵如玉其人攬轡初  
心堯舜君民終焉卷懷南湖之濱位不副德壽不稱  
仁尚有遺芳百世不湮俎豆崇奉公議攸均我闡厥  
幽俾揭貞珉

孝子申公墓碣銘 并序

古阜虎寺洞有坐瘞而封者即故孝子申公在烘宇

汝寅藏也公歿後三十九年嗣子錫驥以家狀請余  
為隧道之文顧此老朽决知其任而義不忍終辭  
謹按公平山人高麗太師壯節公崇謙之後也歷麗  
迄我冠冕相承傳至同中樞希達遜于楚山於公為  
六世曰道章曰世彦曰光漢其曾祖祖禰全州李景  
源其外祖也公以 純廟己巳生天性至孝嘗受業  
于王考愆掩卷而歎曰家貧親老甘旨未供殊非人  
子道理自是躬幹家事漁樵以為養平居務以悅親  
為事大小無敢自專必咨稟而後行至於定省温清  
下氣怡色許多節目皆自然中禮而非勉強所致餘

力誦習惟在小學一部真知實踐或幾乎達曙而忘  
食居喪哀毀踰節三年不御酒肉值忌日常如袒括  
齋沐設饌不以老衰替人教子孫多買書籍敦親戚  
必助婚塋此皆鄉里耳目所睹記而無間然者也多  
士請褒之章夫豈無所以然也乎于 哲宗癸亥享  
年五十五齊高興柳氏孔源女婦德甚備事姑至孝  
鄉里咸稱為孝婦無異辭辛未戊午其生卒塋于辰  
山亥坐二男二女男長郎請銘者次錫現女柳極溶  
崔龍洲孫男秦玟泰燮女宋鎮邦安守恒長房出男  
泰魯恭禧泰卿泰炫女金複秀次房出銘曰

孟氏有訓事親為大公能允蹈夙夜靡懈孝子之配  
又是孝婦殫誠竭力使姑延壽不食之報其後必昌  
我銘貞石用示无疆

遜溪文公墓碣銘 并序

遜溪文公諱命圭字聖和系出南平新羅武成公多  
省之後也麗季忠宣公益漸本 朝都承旨和禮曹  
叅議尚行縣監勉修齋自修最著於公為十二世以  
上曾祖諱演復祖諱繼相考諱思臣俱有隱德妣新  
平宋氏相伯女公以 仁陵壬戌生于綾州里舍自  
幼溫仁慈祥事親至孝應對定省滌漉勤勞無所不

用其誠親齋彌留公心憂色沮不遑暇寐入天台山  
或藥偶得山蔘供之見效執壻哀戚逾節居廬三年  
值忌辰必齋戒器皿釜鬻魚肉脯脩躬自澣濯而裁  
割月朔謁廟春秋展墳每不勝霜露之感早年等室  
於虎溪上日與兄弟宗族遠近名士講磨不輟抱負  
該洽文詞瞻暢而於名利泊如也未嘗爲隨俗進取  
計一日自外還見有一婦女僵死於道小兒號哭其  
側公卽傾橐雇人埋其屍率兒以歸後探問其族戚  
之居海南者令返其喪與兒晚年生理漸縮諸子請  
曰某人貸去百餘金有年今則彼富我貧追索未爲

不可公正色曰古人云臨財無苟得如其哓哓爭辨  
爾失豈不多於所得乎汝輩勿復言也厚於親戚故  
舊遇饑饉則減省自奉而賙恤之有死喪則不計遠  
近而慰存之平居凝然無疾言遽色常以依本分守  
規矩世世爲讀書人勉子孫焉嗚呼此其行義標致  
之大略而鄉道薦剡閭巷傳誦所以藉藉不已者也  
苟非稟賦旣異攜槩有素而加之學問培養之功能  
如是乎今 上巳卯卒于寢享年七十八塋于虎洞  
後山望峙良坐原配豐山洪氏得勲女繼配完山李  
氏恭英女育五男一女男錫正錫肇錫魯錫璣洪出

錫進女崔牽龜李出錫正無育錫肇一男二女男璋  
浩女梁在弘李秉豹錫魯四男二女男俊浩出系世  
父在浩徹浩出系叔父益浩女徐鏐趙在根錫璣一  
女洪洛植錫進一男四女男權浩女宋淙潤李根春  
餘幼在浩請公墓銘于余讀其狀乃鄭處士義林作  
也是可徵遂為之銘曰

南平之文遠有淵源繫公行誼惟孝為先積中發外  
推已及人溫厚慈諒無往非春念斷芬華遯跡徜徉  
百年報應其後熾昌崱彼望峙拱梓苑紆我銘貞石  
一詞匪諛

晚悟齋文公墓碣銘

并序

人生於世命有窮達行有善惡善而達者功施名傳  
而不朽矣其窮者自非大賢以上其功不見是以其  
名不傳其名不傳則所以為不朽之圖難矣柁是乎  
有外史氏之傳焉若處士日新齋鄭義林所撰文公  
錫賢狀則庶幾焉按公五歲孤奉偏慈盡孝受笞欣  
然無幾微色母問痛否則曰不痛蓋恐傷志也庭有  
父植二槐愛護敬重吏欲取為官用公抱樹而泣吏  
終不敢近又力貧置先墓祭田俾享祀不之此公之  
孝也其兄醉嘗負而歸嘔濕背負自若昆季三人雖

別居亦同產無彼我心歲饑輒減已賙族鄰此公之  
友而睦也教子孫有法度論行檢則先孝悌論學問  
則後文章禁奢侈斥淫邪皆臝臝乎有古君子風此  
公持心行己之大槩也嗚呼公生遐鄉又不能達雖  
有善可傳倘非處士幽顯闡微之苦誠孰能知其名  
哉公之子成浩又謁余以墓道之文余辭不獲則遂  
考狀揭大如右繼叙其生卒世系而為之銘公字敬  
甫晚悟其號也文氏出南平以新羅武成公多省為  
始祖歷麗至我世有名碩若江城君忠宣公益漸純  
質公中誠景惠公和敬肅公尚行最著又有勉修齋

自修以孝友文學拜谷城縣監鄉人祭于社花公為  
十三世曾祖曰緯相祖曰思仁考曰致基外祖曰河  
東鄭赫元生於 純廟壬子卒於今 正丙申壽七  
十五葬于某山某坐原齊驪陽陳錫祚女有閨範先  
公十四年卒墓南平元洞壬坐育二男二女男邦浩  
成浩女李楊茂梁琪默邦浩歿無育成浩三男濟敬  
過房濟翊濟學銘曰  
為仁之本曰惟孝悌公能允蹈有此良貴日新之狀  
足垂不朽我係以銘昭示非誣

都承旨南岡金公墓碣銘 并序



金君昞植過余青城致其門父兄之言曰我 中宗  
乙亥 章敬王后上仙吾先祖南岡公同金冲菴朴  
訥齋聯疏請復 端敬王后慎氏位號其辭旨 慎  
氏自 殿下龍潛之初載成好述及 殿下入承大  
統正位中壺受臣民之賀膺母后之尊彼元宗輩負  
恃其功放逐 國母犯天下古今之大分此正萬世  
之罪人也今內政缺主宜因此時復正 慎氏于壺  
位存大分於既隆全舊恩於已睽且明正元宗等之  
罪追奪官爵曉諭中外使當世與萬世灼然知大分  
之不可犯也於是兩司指為邪論請拿鞫賴鄭文翼

光弼力救徒配于長興之碧沙驛此其載錄於 國  
朝寶鑑與已卯列傳者章章明甚而竊聽於士大夫  
尚論則類以伊日疏舉歸重於冲訥二先生而同功  
一體之南岡公獨不與焉心竊恨之其顯刻墓道使  
後嗣子孫咸知是祖之為而砥行立名世世無怠此  
實吾門之一大急務也汝其走畿甸謁薦紳先生文  
敢以請余寡陋不敢當金君退而復來若將不得文  
不返鄉也余感其懇而悲其志謹按公諱永幹字挺  
之系出金海以駕洛首露王為鼻祖麗末有諱普全  
寧府院君諡忠簡公生諱到門始仕我 朝官至三

司副使曾祖諱觀戶曹掾郎 贈參議祖諱孝芬瑞  
興都護府使 贈參判考諱震孫校理 贈判書娶  
漢城少尹慶州李種仁女生丈夫子五人公其季也  
自幼性剛方儼有成規早擅文藝年二十九登燕山  
朝文科歷官至弘文館副應教數直諫不入遜居廣  
州 靖陵改紀被召爲都承旨疏劾子光怙勢美權  
之罪出爲黃海道觀察使及謫長興遂挈家南下足  
不出里門口不言時事躬親耕稼詩酒自娛混迹於  
村父野老之間不以朝紳自居遺戒子孫勿應舉覓  
官是以公偉然大節當時鄉人士無得以稱焉乃其

心則蓋所謂天理民彝之不可泯者二先生之道尊  
則公之道亦尊二先生之名不滅則公之名亦不滅  
何待余言抑所未可知者公之聯名謂以疏首則監  
修國史者不應喚賓爲主先之以冲訥謂之疏下則  
夫以知申長官降列於四品外職之末亦無是理豈  
公時直尚書出納疏章惡之者遂劾以徑先捧入而  
同其罪謫也歟是則尚當有以攷之也大抵公嘉言  
懿行之可傳者必多而文獻無徵並與其生卒年月  
而闕焉可恨也邑配貞夫人松京馬氏判書崇女曰  
勵俊曰瑞麟俱叅奉曰蒙俊億俊俱通德郎曰安聃

曰吳瑞曰任自淑曰南孝容是公之四男四女孫曾  
以下至今十餘世之遠不可盡記晒植其十二世孫  
也墓在府北龍溪面萬壽洞坐西之原銘曰  
駕洛故國長發其祥首露肇迹單及海疆圭組名德  
歷世彌昌公早騫騰平步承宣矧伊忠直天與其全  
誰為知己冲訥兩賢齊心秉簡聿扶 坤極屈短伸  
長天理靡忒乃其秉執志士溝壑于何考證國乘野  
錄萬壽之岡衣履攸託我銘在茲垂示千億

載寧郡守文公墓碣銘

并序

仁祖甲申器遠伏誅策金壘具仁屋等為效忠者

炳幾決策寧國功臣其外卿宰以下參佐諸臣並錄  
勲有差載在盟府故載寧郡守丹城文公弘器字重  
淑即其一也墓在延安府西鶯巖下坐丙之原後孫  
載興東錫等相與謀曰吾先祖塋既數百年尚闕顯  
刻無以別於樵牧失今不圖曷以詔茫昧而飭悠久  
於是伐石為碑請文在余謹按文氏始自新羅名卿  
達士世不絕書麗末江城君益漸左司議謚忠宣功  
著國乘生諱中誠入本 朝屢徵不就 贈兵曹判  
書謚純質生諱和受學於牧隱李先生官知申事  
贈左贊成謚景惠再傳諱永佐豐川府使兼按撫使

又再傳諱承祖慶源判官始居延安於公五世以上  
曰瑞龜谷山郡守曰繼儉忠武衛副司直曰鐵壽尚  
衣直長曰孝宗司憲府監察 贈左承旨是其高曾  
祖彌四世公文藝出倫勇力絕人衆推爲文武全材  
而屢舉不售謂射乃六藝之一其爭也君子遂從事  
射御登科歷官至郡守錄二等原從功惟慷慨不隨  
俗低仰至其末年退歸先塋下不以宦達人自居混  
迹於村父野老之間等臺丈浦上號曰釣來賦詩彈  
琴寓興山水沒身無怨悔之意蓋其從仕履歷平日  
事行應多可述而世代已遠無可考證噫難乎其爲

文獻惟徐尚書俊輔所述誌文視傳留侯而徵畫工  
者殆其信矣乎配劉氏籍白川都正迪女墓同原李  
氏籍全州通德卽詹女墓谷山公墓左酉坐子男四  
人時進宣傳官時達校尉時遇時迪並遠德郎時進  
男尚綱時達繼子尚周時遇男尚載尚周過房尚獻  
尚儉女南宮會趙萬象時迪男尚質文學名世至播  
燕京尚德尚博尚大尚訥曾玄以下不盡錄銘曰  
或弛或張文武一致公奮韞韞丈夫其志帶礪叅名  
民社效績惟斯爲最餘皆可略贊彼佳城呵禁樵牧  
我銘不諛視此貞石

納新齋權公墓碑銘

昔尤菴宋文正先生當己巳之禍受命于井邑時羣小氣燄熾人莫不惴惴屏息無敢顧視唯連山郡守權公字亨迎護奠賻殫誠竭力至罷黜無悔色事在楚山日記連山之曾孫有納新齋者師事尹屏溪先生得聞尤遂緒餘為當時諸長德所推翹似中諱章夫其表德也公天姿英特身幹豐碩孝友出天學問精邃士大夫過東南者必指其廬而稱誦之公平居恂恂去牙角至辨邪正是非處有斬釘截鐵之勢人之見其風采議論者皆注目色動屢入薦竟題處士

旋惜之者公議也於公何有焉考諱翁妣義城金氏世說女諱啣坡平尹氏之復女本生也祖諱壽期贈叅判連山公 贈左承旨自公五世祖德菴公諱克履始居宜寧其先安東人鼻祖麗太師幸中世有醴泉府院君文坦公漢功花原君忠憲公仲達判吏曹嗣宗牧使濬最顯云生 景廟甲辰歿 英廟丙申壽僅五十三葬縣東芝山已坐原齊坡平尹氏經歷忠彥女墓與公同原生四男三女男思岳思益思宅思穆府使女適李福峻李敏行尹宅民孫男哲夏鳴夏榮夏長房出永夏二房出正夏得夏養夏三房

出斗夏箕夏鳳夏營將四房出曾玄以下不盡錄竊  
惟人之務實行識義理者雖出於天賦之固然然必  
由祖先垂統之正是以君子論其世若公家淵源之  
美實自連山公來吁人可不知所謹哉公之玄孫振  
熙來請銘銘曰

家庭詩禮尤遂淵源惟孝友于淑慎其身芝山之原  
佳城鬱鬱我撮其蹟銘此貞石

贈童蒙教官竹村權公墓碣銘 并序

公諱思學字敬能竹村其號也權氏系出安東其上  
世諱幸為麗太師以達權得姓終麗之世代有聞入

八本 朝有諱仲達花原君謚忠憲至弼善諱濬號  
霜岳始居宜寧是生克履號德菴是生欽 贈僕正  
是生并亨無子子牧使字亨子壽祥是又無子以兄  
贈叅判壽期子習為后公之祖也考息中僉樞號梅  
竹以學行屢薦不仕梅竹公之本生父曰以準妣高  
靈朴氏泓女婦德純備以 英廟戊寅生公年十四  
始讀小學能自修飭有成人度事父母盡孝嘗有詩  
曰愛父如愛母敬母如敬父苟能躬愛敬庶幾不罪  
負蓋以世人孝者鮮愛敬或事母之禮不若事父故  
感而作也三十一中生負自後不赴舉專學為己雖

感暑必冠帶終日危坐如對聖賢手不釋卷沈潛反覆有得則識之五十年如一日自小學四子五經心經近思皆有記疑又有心學圖性情說歎世俗冠婚不行古禮縱不能與衆移俗猶可用之家中因取家禮及輯覽撮其切要間付疑義名為二禮輯畧是蓋公平日喫緊用工之實也其推而行之也修梅竹公洞約諱信以時俗庸反淳於宗族尤盡恩義立義門契以救其貧窮喪難又於廟已毀之宗閭其無嗣設方制產以立後教子弟必先以禮正閨門必逐巫祝皆截然有法焉嘗曰學者固當以格致為先其要莫

急於立志今之士能不奪志於舉業者鮮矣著四譬說以立志為開基存心為立本讀書為浚井躬行為食實又以勤儉敬恕四者為銘以自警而警人公早絕世念或勸之仕公作詩曰籬菊庭蘭皆所友蹊桃園李任誰家題崑巖詩曰巖如砥柱衝波立水有源頭向海流可見公金石之操而學有本源矣嘗因量田為知縣作圖式井井有條以至律曆兵數醫卜等書亦皆旁通而曲暢可見公之才之全矣卒於 純廟壬辰壽七十五 哲宗乙卯以學行 贈童蒙教官公初娶海州鄭睦女農圃文孚之後繼娶綾州具

鼎燉女壘在本縣寶林里紅桃峴負未原具氏附焉  
鄭氏別壘于草溪青元里五榜洞男長忠夏生員次  
心夏女鄭匡根皆具氏出孫男秉驥秉謙秉周女鄭  
以善曹仁煥趙命植朴泰佑長房出秉珪秉珰女李  
鎮瑀進士鄭應圭曹台煥次房出秉驥無育以秉周  
子龍熙爲后秉謙无子以族子永熙爲后女李鍾夏  
秉珪三男鼎煥中熙晚熙女鄭在三秉珰二男三女  
哲熙都事德熙女鄭邦璟全永璫都事鄭學中玄孫  
以下不盡錄晚熙與其從弟哲熙謀豎石于墓陴八  
百里間銘于余噫梅山洪文敬公肅齋趙文肅公皆

爲公序且狀焉則其言不啻可信而艾山鄭君載圭  
亦爲之誌辭甚法可傳其不待子雲堯夫而可知公  
之爲篤行君子人也余又何贅因作辭遣而刻之辭  
曰  
嶺之山兮秀而嶸嶺之水兮深而清山水之氣兮鍾  
而生人賢哲之輩興兮尚餘韻之猶存維公之承家  
學兮師心而獨造以經傳爲田地方俛孜孜而不知  
老懷璞玉而不訾魯兮惟恐入林之不密荷衣華兮  
蕙帶長伴春猿兮侶秋鶴生則順而死則寧兮有梅  
肅之揄揚我作銘而匪諛兮刻貞石而示茫茫



司諫院獻納遜窩權公墓碣銘并序

權學士鳳熙益鉉晚文也日以書來曰吾仲父遜窩公釋褐三十年內外踐歷雖不顯著伊厥事行蔚有可述而壘未及銘竊懼其愈久愈遠闇然不章子其圖之余不敢以陋拙辭謹按公諱秉德字仲淑權氏之先蓋出新羅其籍安東自麗太師諱幸始歷八世諱守洪左僕射再傳至仲達密直司使花原君我朝受命自靖不仕諡忠憲是生嗣宗吏曹判書是生執德軍器監正始居三嘉中移丹城今為宜寧人四傳至諱世仁官縣監壬辰舉義生諱禧文科弼善師

事鄭寒岡光海讎 母杜門晦迹 仁祖丙子以光

州牧使勤王道聞媿成痛哭南歸自號霜岳居士霜岳之孫曰鏞號荷亭以進士率泮儒訟尤翁寃公其七世孫也自後各德不替曰翔曰稱中曰思直曰學夏是其四世外祖檢閱居昌慎認明兄弟四人公序其二也少精功令輩行莫能先 純廟乙酉登明經科十年甲午陞六始為司憲府持平疏陳開賢路抑私帑禁奢侈蠲痼瘼首尾數千言侃侃有古諍臣風語多撞觸薄竄旋宥拜成均館典籍移社稷令甲辰乙巳連除騎省禁衛二即以奉職恪謹 賜璿源譜

一丹仍陞掌令為通禮院左通禮丙午由司諫院獻  
納外除為狼川縣監為政廉白一境安堵民有罪犯  
死律而事若可原者陰持貨紹介公正色却之曰見  
利賣獄吾所不為邑人皆稱誦及解官歸裝蕭然至  
妻子饘粥不繼而處之泊如乃曰昔朱夫子遇遯焚  
章聖凡雖殊時義一也遂以遯窩扁其楹一室圖書  
優遊自適所嘗玩繹者唯闡義昭鑑禮疑類輯等書  
也以 哲宗戊午月日考終于寢距其生 正宗戊  
申享年七十一葬在縣北紙村面坐甲之原公天賦  
秀朗風儀峻整望之巍然人皆敬悼居家盡孝友之

道篤義方之訓處鄉黨恂恂焉惟仁善是親對後進  
勉勉以孝悌忠信其遊宦也所與善厚皆一時士大  
夫之賢且仁者見席勢驕蹇怙侈放縱者便唾鄙斥  
絕不相交關前後資級惟隨職盡分公議所推而致  
非毫髮越趨躡嚙苟且僥倖如世俗之昏夜乞憐是  
其秉心持已之正直牢固皆可書而至於言事有  
謬謬之節臨財嚴苟得之戒者殆又求諸古人而不  
可多得者也吁亦賢矣哉配潘南朴氏震希女無育  
草溪鄭氏守儉女慕各村男奎熙成熙女朴恭鉉李  
玟相奎濕男載厚載翊載用仲季並過房成熙繼子

載翊載厚男尚鉉載翊男圭鉉恒鉉過房銘曰  
石陵古家世有氣節霜老荷翁秉義有截公蚤釋褐  
羽儀如玉平步委蛇侍從字牧人噤我言見金如礫  
晚賦遂初其心介石末路窮亨未足爲歎我銘斯語  
昭示不刊

贈司憲府大司憲愚谷尹公墓碣銘 并序

維咸平縣紫陽山下洞口雲谷有負乾馬鬣而封者  
故 大明處士 贈司憲府大司憲尹公諱殷卿藏  
當有顯刻而歷世未遑後孫等相與言曰歲月滋荒  
不可使後人不知是祖之宅也謀立石墓道于里踏

跣請文於不佞謹按公字汝任籍坡平上祖文肅公  
權開拓六鎮策鎮國功臣其後翰林學士吉有罔僕  
義號遯翁上庠德生 魯陵降號守義不仕自號狂  
叟五傳至副帥禮衡壬辰殉義鐵原號林泉即公會  
祖祖海部將丁酉遇賊不屈而死夫人康氏翼蔽殉  
烈考挺立叅議恨未復讎哀慕終身妣淑夫人海州  
崔氏正郎峻極女公以 萬曆乙卯生天賦粹如自  
齟齬屹如成人才入小學能知愛親敬長爲童子之  
先務及長文藝夙就志尚慷慨不屑舉子業致力於  
左氏書 仁祖丁丑聞南漢媾成三學士被執北行

輒喟然太息曰此非士君子出世之日吾豈若處猷  
畝由是而朝耕暮書以送平生也哉遂等室于屏山  
之下自號愚谷所嘗玩繹者惟魯連傳伯夷頌淵明  
辭數篇今巖壁上山中惟見日何處 大明留十字  
顯刻是其實蹟也享年七十六而以 崇禎六十三  
年庚午月日考終于寢旌曰 大明後海東愚谷處  
士尹某之柩從遺命也嗚呼四海左衽之日惟碩果  
吾東得保 洪武衣冠而壇有大報廟有萬東爲士  
者猶知以忍痛舍寃迫不得已八字存諸腦中而有  
與衰撥亂之望矣及自甲午以後則三綱五常蕩然

無地禮樂淪於糞壤人類化爲禽獸而不可傳聞於  
後世矣使公九原可作而得見今日交象則其將有  
別般處義不止避山逃海而爲可安於心也配陳氏  
籍驪陽考縣監邦直李氏籍咸平考英男墓各附四  
男有賓有三有達有亨有賓男聖采聖進有三男聖  
起聖希銘曰

箕之山兮蒼蒼潁之水兮泱泱山可夷水可竭公之  
名靡終極

南岡朴公墓碣銘 并序

公諱海敏字大有順天朴氏湖南大姓始自高麗府

院君蘭鳳入我 朝右議政靖厚公可興知議政府  
事文肅公錫命寔大顯文肅曾孫而溫策 中廟靖  
國勲封昇平君公其十一世孫也世承簪紱參判重  
初同樞陽鎮曰聖源曰生鉉是高曾祖禰外祖全州  
李顯允公天賦秀朗自學語已知敬長客至能迎送  
問對學書無難易一過目輒不忘十歲遭父病禱天  
血指及喪哀毀如成人事母夫人及祖父母一念洞  
屬罔敢少懈生養極志物壘祭盡哀敬一如古孝子  
爲者早避公車守志林樊每日早起所誦念玩繹者  
不外乎庸學心經近思朱書節要等書又謂禮家折

衷莫善於沙溪備要常抄節爲小本出入必袖之以  
資考據至其修省節度則深以慎獨二字爲切要平  
居暑不解帶寒不薰爐簡重寡言若有所思及其接  
人開懷款洽色笑可親雖僕隸狗馬之微亦不輕加  
叱咤必諄諄曉譬期於感悟重修不祧之廟痛禁西  
洋之物以至值歉歲捐財穀施及鄰里親戚者皆言  
足聽聞蓋公早孤嘗室雖不克肆力爲學卽此數事  
其姿質之美制行之篤不可誣矣其曰孝是百行之  
源人而不學孝悌不立云者又知其出於喫緊得力  
而非空言而已也生以 純廟壬辰卒於令 上戊

子享年五十七葬在某地某坐配羅州林氏魯洙女  
有女士風六親誦德育一男二女男昌東女適鄭雲  
鳳林鍾祐昌東將伐石以豎墓前用告樵牧以狀來  
請銘銘曰

昇平古家曰有魯士仁孝基本不替終始此其大者  
餘皆可畧不羸于躬後人是託我闡其幽刻此貞石

楸軒姜公墓碣銘

并序

公諱玟會字士悅號楸軒姜氏系出晉陽為東方顯  
姓勝國之季故堂文學諱淮伯號通亭與圃隱陶隱  
諸先生建議革胡服襲華制為時名臣入本朝簪

組輝赫曰宜溥曰柱東曰恭煥曰在勉文科正言外  
補奉化以清白見稱是其高曾祖考四世妣朔寧崔  
氏極南女以純廟乙亥五月六日舉公于晉州培  
春村第甫十歲失恃而謹禮如老成並後每日上墓  
哀號家人憫其毀瘠固勸以肉終不聽既長博通經  
史能於詞賦隨正言公於奉化任所專意讀書不近  
聲色丙午丁正言公憂喪祭一遵家禮服闋與伯兄  
同樞公搬移安陰之楸川見扶溪田處士秉淳兄弟  
結道義交而考槃於華林泉石以今上巳丑正月  
十七日終享年七十五踰月窆于本縣靈覺負乾之

原公風采頽然寬厚有長者氣像御家有法度門庭之內無間言事伯兄如嚴父日候其側每值先忌必盡誠敬鼎俎籩豆小不如意憂形於色尤致力於先世墳塋不遠千里獨往展省改蒞堅石祭田等事皆竭誠措辦早治功令屢屈而無怨色嘗參面試巡使金公學性歎曰雲錦之才棟樑之器遂薦于朝而不報配昌寧曹氏理源之女繼配海州鄭氏某之女皆有婦德育三男二女男長永保次永糾次永碩過房女長適議官李浚學次適魚命駿永保生二男一女男璉秀桂秀女李鉉友永糾生四男一女男民秀麟

秀龍秀鶴秀女洪淳龍永願生一男三女男吉秀女廬台淳鄭錫朝季幼公病枕常誦洛閩箴銘與感興詩古人所謂一息尚存此志不容小懈者殆近之矣  
遂爲銘銘曰

雲錦之才胡爲乎不得爲黼黻棟樑之器胡爲乎不用於厦屋非但爲此公之命薄抑亦爲後人之嗟惜

贈童蒙教官鄭公墓碣銘

并序

嶺南之晉州故有美行誼屢爲州牧所薦刻而不一命者曰鄭公諱煥愚字致真其人也初公讀書爲舉子慨然以功名自許既而連不得志於有司歎曰此

固有命焉不可求而得也遂絕意歸鄉與兄諱煥成朝夕遊處立心制行一以篤倫理長恩愛為主凡奉先庇下皆惻怛自然見至誠喜文遊自鄉黨僚友以至洛下薦紳凡有時譽者皆與之相善雖家居館學有大議論必千里走書問於公李公亨夏尹公守鳳之帥晉州兵馬也皆以公行義聞于監司監司達之朝遽以今上乙丑十一月二十三日卒享年僅五十八後因多士上言特贈朝奉大夫童蒙教官鄭氏系出延日上祖諱襲明樞密院知奏事文學節義炳煥麗史十傳而至圃隱先生諱夢周是爲東方理

字之祖享食文廟先生孫諱保 莊陵朝節義卓然享寧越八賢祠自是而六傳至學圃諱暄 仁祖朝徵士享晉州玉山院是松公為七世也會祖諱道貫祖諱國濟考諱顯采通德郎通德公有四配曰草溪鄭氏曰安東權氏曰羅州朴氏曰密陽朴氏羅州朴氏以 純廟戊辰五月七日生公未一月而歿祖母梁夫人實收公而鞠之文河盧氏咸昌金氏草溪鄭氏海州鄭氏公又四娶而兩鄭氏各生一男長喆基主事次鳳基浩鎔侍御瀚鎔武科過房喆基出也駿鎔鳳基出也公初塋州之北坪後移厝于河東內橫



甫堂島村負申之原距夫人草溪鄭氏論谷之兆隔  
水而相望焉鳳基君以狀授余乞銘其阡君重厚有  
文學能繼其家美者也銘曰  
行以孝本德由善積雖隱亦顯埋乃不忒我揭銘章  
以警樵牧

明谷趙公墓碣銘

并序

余與趙君泳善相知有年頃於方丈之役又邂逅其  
從父昌駿於華嚴蕭寺倉卒叙話槩知爲忠信樂易  
非禮不蹈之吉士也既而述其伯兄明谷公遺事屬  
以金石之文謹按公諱昌驥字養彥趙氏以王川府

院君忠獻公諱元吉爲遠祖副護軍宗煇避菴處士  
洵其祖若考外祖廣州李象參 繼廟丙戌 當于  
庚辰其生卒少業功令闡鳴場屋若經心進取與世  
俯仰則拾科第致通顯未嘗非分內事乃決意退步  
寓志林泉杜門却掃專心古道四子六經咀嚼反覆  
循環不已於易則殆歎棗之嗜而菽粟之用也仰思  
俯讀臥起不輟三聖之言如舌是出則又著之文字  
有天人說養才說讀書五法斥邪說等篇出而應接  
如蘆沙竒公正鎮心菴趙公斗淳如淵金公大根皆  
稱其着文字精細鄉里一老人言衰年閑寂無由遣

日公曰何不讀書老人曰年踰六旬雖讀何為公曰  
父祖晚年兒孫初年兒孫模範其不在父祖乎其儷  
焉孜孜老而彌勤如此公事親甚孝居窶善養病致  
憂喪致哀暑不脫衰憊不董桂朔望展墓莫之或闕  
友同氣如一身處羣從如手足交朋友盡切悃發後  
進勉孝悌出則誦族卦入則誦家人卦羣居終日慮  
或解弛則誦乾卦以為常噫若公殆聖人所謂行有  
餘力則以學文者也葬在谷城縣道上面楮田負葵  
之原配全州李氏基洪女有婦德育一男二女繼配  
和順崔氏鳳民女男馨燮有才無年女適金莫淇崔

炳貞馨燮無育取族兄定九子永埴子之女適朴敏

樞銘曰

富者貴者彼何人斯行而學而公實以之最所致力  
四聖心訣于行于止視以為則大既先立餘皆可畧  
刻辭貞石警示于億

勉菴先生文集卷之二十八

